

2 SAMOWIL

2 SAMOWIL 1

Miyaneg i Daod so Kiyapatay i Saolo

Oriyan o kiyapatay i Saolo na komiyasoy si Daod sa Siklag kagiya mataban iyan so manga Amalik na tomiyareg roo sa miyakadowa gawii.

2 Sii ko miyakatalondog a gawii na aden a miyakaoma a mama a poon ko kampo i Saolo a makikisi so nditaren iyan ago aden a bayanek ko olo niyan. Kagiya makaoma ki Daod na somiyodiyod on.

3 "Anda ka miyakapoon?" a iniise on i Daod.

"Miyakapalagoy ako a poon ko kampo o manga Israil," a inisembag iyan.

4 "Antonaa i miyolaola?" a iniise i Daod. "Teroa ngka raken!"

Tig iyan a "Piyalagoyan o manga sondaro so katidawa. Madakel kiran a miyanga ooteng a miyamatay. Na miyatay mambo si Saolo ago so wata iyan a si Yonatan.

5 Na iniise i Daod ko mangoda a miyanotol on a "Andamanaya i kiyatokawi ngka on a miyatay si Saolo ago si Yonatan?"

6 "Miyatabo a sisii ako ko palaw a Gilbowa," a tig o mangoda, "na miyailay aken si Saolo a miteteken iyan so bangkaw niyan a pendasegen o kikakaro ago kikokoda a manga ridoay niyan.

7 Kagiya domingil sekaniyan na miyailay ako niyan na tiyalowan ako niyan, na inisembag aken a 'Oway, sir.'

"Tig iyan a 'Antawaa ka?'"

" 'Amalik ako,' a inisembag aken.

9 "Mandiyadi na pitero iyan raken a 'Song ka sii na go ako ngka bonoa! Piyakapapatay ako den ogaid na pengginawa ako pen.'

10 "Kagiya ka maoto na inobay aken sekaniyan na biyono aken, ka katawan aken a oriyang angkoto a kiyapalii ron na di sekaniyan den makapegoyag. Na kinowa ko so sangkad a sisii ko olo niyan ago so rintu ko barokan iyan na inowit aken sii reka, kadnan ko."

11 Na piyangisi i Daod so nditaren iyan na lagid oto mambo so pinggolaola o langon a mama a ped iyan,

12 Ka inimboko ago kiyagoraakan iran si Saolo ago si Yonatan ago so manga sondaro o Allah ago so pen so isa ka maginged a Israil sabap sa miyamatay siran ko katidawa. Na mipowasa siran taman ko kiyaperimon.

13 Na iniise i Daod ko mangoda a miyanotol on a "Anda ka miyakapoon?"

"Amalik ako a mananangga sii sa inged iyo," a inisembag iyan.

14 Tig i Daod a "Ino ka da malek sa kiyabonoa ngka ko kiyaidinan o Allah?"

15 Na tiyalowan i Daod so isa ko mama niyan a tig iyan on a "Songowi ngka na go ngka bonoa!" Na liyakot iyan so mangoda na miyatay.

16 Ka miyatero rekaniyan den i Daod a "Pimbaba a ka a kabonoa reka. Siyakab ka a ngari i ka kagiya teroon ka a 'Biyono aken so kiyaidinan o Allah.' "

So Kiyandiyagawi i Daod ki Saolo ago si Yonatan

17 Giyai so bayobayok i Daod a inindiyaga niyan ki Saolo ago si Yonatan,

18 Na inisogo iyan a mipangendao ai ko manga taw sa Yodah; (misorat ai sii ko Ribro a Hasar):

19 "So manga olowan ka, hey Israil, na kikakekelit a miyamatay sii ko manga bobongan ka!

Miyanga ooteng den so manga wawaraw a sondaro tano!

20 "Di niyo ai penotola sii sa Gat;

di niyo pen pekalangkapa sii ko manga lalan sa Askilon,

ka o ba baden ikababaya o manga raga a Pilistiyo,

na o ba baden ikasonor o manga wata a babay o manga kapir.

21 "Hey manga palaw sa Gilbowa, di kano den kanamogan o di na kaoranan, aya pen o ba makaonga so pereperan ko manga pangomaan iyo!

Ka roo kiyaresikan so manga kelong o manga babager,

a so kelong i Saolo a di den keonasan a lana.

22 So rogo o miyapamono ago so sapo o manga babager

na da den panganogoni o pana i Yonatan,

na da on den makapeto so pedang i Saolo a ba di masosoat.

23 "Si Saolo ago si Yonatan;

pekebabayaan siran ago makalimoon ko kaooyagoyag iran,

na sii ko kiyapatay iran na da siran makambelag.

Magaan siran i kalayog a di so manga banog,

ago manga babager a di so manga arimaw.

24 "Hey manga babay a Israil, mbokoon iyo si Saolo

a minditar rekano sa manga pipiya a dinis a mariga,

ago piyagartaan iyan so manga nditaren iyo sa kabolawanan.

25 "Miyanga ooteng so manga wawaraw a sondaro a miyapamono ko katidawa!

Makakekelit si Yonatan a miyatay sii ko manga bobongan.

26 Ipemboko aken seka, Yonatan a pagari aken;

tanto aken seka a inikasoat!

Piyakamemesa so kiyababayai ngka raken,

lebi a mapiya a di so kapekebabaya o manga babay.

27 "Miyanga ooteng so manga wawaraw a manga sondaro!
Kiyadaan sa bali so manga gomaan iran ko katidawa!"

2 SAMOWIL 2

Miyabaloy si Daod a Dato sa Yodah

Da matey na inisean i Daod so Allah a tig iyan a "Ba aken songowi so isa ko manga inged sa Yodah?"

Tig o Allah a "Oway, ika roo den."

"Antonaa inged," a iniise i Daod.

"Roo sa Hibron," a inisembag o Allah.

2 Kagiya ka maoto na somiyong roo si Daod a ped iyan so dowa kataw a karoma niyan a si Ahinowam a taga Yasriil ago si Abigail a inikabalo i Nabal a taw sa Karmil.

3 Piyakaonot pen i Daod so manga mama niyan a rakes o oman i pamiliya iran, na komiyaden siran sa Hibron ago so kikadadair on a manga inged.

4 Oriyan iyan na miyakaoma sa Hibron so manga taw sa Yodah na roo iran siyalawatan si Daod a madato sa Yodah.

Kagiya matero ki Daod a so manga mama sa Yabis Giliyad i lomibeng ki Saolo

5 Na somiyogo sekaniyan roo sa makapetero kiran sa "Karakmatan kano o Allah ko kinikalimoon iyo ko kadnan iyo a si Saolo ko kinilebengen iyo ron!

6 Na pengnin ko a pekiilay rekano imanto o Allah so limo iyan ago so kasasarigi ron, na saken mambo na penggolaolaan ko sekano sa mapiya sabap sangkai a pinggolaola niyo.

7 Kagiya ka maoto na pakababager kano ago pakawawaraw! Miyatay si Saolo a kadnan iyo, na biyaloy ako o manga taw sa Yodah a dato iran."

Miyabaloy si Isbosit a dato sa Israil

8 Samaoto na so komandir o manga sondaro i Saolo a si Abnir a wata i Nir na kinowa niyan si Isbosit a wata i Saolo na inowit iyan ko ripag a lawasaig a Yordan sii sa Mahanaim.

9 Na biyaloy niyan sekaniyan a dato sii sa Giliyad, sa Asori ago sa Yasriil ago sii pen sa Ipraim, sa Baniyamin ago sii ko dalem a Israil.

10 Miyakapat polo ragon a idad i Isbosit isako makandato sa Israil, na mindato sa miyakadowa ragon. Ogaid na so mbatabataa a Yodah na pepegonot ki Daod.

11 Aya kiyatey a kandadato i Daod sa Yodah sii sa Hibron na miyakapito ragon ago nem olan.

So Kiyatidawa o Ndatoan a Israil ago so Ndatoan a Yodah

12 Si Abnir ago so manga mama i Isbosit na miyawa sa Mahanaim na somiyong siran pasin sa Gibiyon.

13 Na lominiyo si Yowab a wata i Siroyah ago so manga mama i Daod na tiyalabok iran siran sii ko ranaranaw sa Gibiyon. Miyamangontod siran langon, a so isa ka saporompong na sii ko sabala o ranaranaw, na so isa on na sii mambo ko sabala on.

14 Mandiyadi na pitero i Abnir ki Yowab a "Pakatindegen ta ago pakapelobelobeden so manga ngongoda ko kamamasaan ta."

"Oway, sowaan ta nan," a tig i Yowab.

15 Na miyamanindeg siran a sapolo ago dow a kataw ko mbatabataa a Baniyamin a tomatampil ki Isbosit a wata i Saolo, ago sapolo ago dow a manga mama i Daod.

16 Na giyoto a tikes o oman i isa kiran so olo o sangan iyan na inisoker iyan so gonong iyan ko kilid o sangan iyan, na palaya siran den miyamakakelit a miyamatay. Sabap roo na giyangkoto a darpa sa Gibiyon na pambetowan sa "Pangomaan a manga Gonong."

17 Giyanan den i pasodan o tanto a masakit a kiyatidawa sangkoto a gawii, na si Abnir ago so manga taw sa Israil na tiyaban o manga oripen i Daod.

18 Ndodoo so telo kataw a manga wata i Siroyah a manga mama, a si Yowab, si Abisay ago si Asahil. Si Asahil na tanto a magaan i kapalalagoy a datar o saladeng.

19 Siyaloba iyan si Abnir na da den panilasilay sa kawan an o di na sa diwang ko kapeselobaa niyan on.

20 Dingingilan i Abnir a tig iyan a "Seka bes, Asahil?"

"Saken," a inisembag iyan.

21 Na tig i Abnir a "Kori ka sa kawan an o di na sa diwang na pegenga ngka so isa ko manga ngongoda na agawa ngka on so gomaan iyan." Ogaid na da miyog si Asahil o ba niyan geneki somaloba si Abnir.

22 Na tig peman i Abnir ki Asahil a "Geneki ako ngka somaloba! Ino aken seka kebono? Andamanaya i kakerawa ko tomenteng ko paras i Yowab a pagari ngka?"

23 Ogaid na somiyangka baden si Asahil o ba genek sa kapeselobaa niyan on. Sabap roo na inibaseg i Abnir so patag a poro o bangkaw niyan ko tiyan i Asahil, na lomiyambas sa likod iyan. Sagogona a miyakakelit sekaniyan a miyatay, na oman i isa a miyakaoma ko darpa a kiyatengan ki Asahil na petereg on.

24 Ogaid na si Yowab ago si Abisay na siyaloba iran den si Abnir, na sii ko kasedep o alongan na miyakaoma siran ko bobongan sa Amah a marani sa Giyah sii ko lalan a ipesong ko mitataog a kaden sa Gibiyon.

25 Samaoto na so manga mama ko mbatabataa a Baniyamin na pitimoan iran langon si Abnir na miyamanindeg siran ko poro o bobongan.

26 Na liyalis i Abnir si Yowab a tig iyan a "Ba da a rint as o di tano dii kapolang? Ba ngka di katawi a mapait a keposan sii? Ay katey pen a kasogoa ngka ko manga pagtaw ngka sa kataregi ran seloba ko manga pagari ran?"

27 Somimbag si Yowab a tig iyan a "Mataan ko kaooyagoyag o Tohan ka o da ka tero na di den tereg so manga mama ko sa kapeselobaa iran rekano taman sa mapita."

28 Mandiyadi na miyamogiyong si Yowab na tomiyareg so langon a mama niyan; gominek siran den seloba ko manga Israil aya pen o ba siran tidawa peroman.

29 Lomiyalakaw si Abnir ago so manga mama niyan ko miyababasa gawii a pegokitan iran so Kapantaran a Yordan. Rominipag siran sa lawasaig na tomiyaros siran lomalakaw taman sa miyaoto a alongan, na miyakaoma siran sa Mahanaim.

30 Kagiya gomenek seloba si Yowab ki Abnir na tinimo iyan so langon a mama niyan, na liyo ki Asahil na sapolo ago siyaw kataw a manga mama i Daod a miyatendo a miyada.

31 Ogaid na so manga mama i Daod na miyakapatay siran sa telo gatos ago nem polo a manga ped i Abnir a manga taw sa Baniyamin.

32 Na kinowa i Yowab ago so manga mama niyan si Asahil na inilebeng iran ko kobor o ama iyan sii sa Bitlihim. Oriyan iyan na lomiyalakaw siran ko miyababasa gawii, na miyakaoma siran sa Hibron ko kakepita iyan.

2 SAMOWIL 3

So dii katidawa o ndatoan o pamiliya i Saolo ago so ndatoan i Daod na miyatey a kagaganday niyan. Samanaya na pepekala a kapepekabager i Daod, ogaid na so ndatoan o pamiliya i Saolo na mitataros den a kapepekalobay niyan.

So manga Wata i Daod

2 Aden a inimbabawata i Daod a manga mama sii sa Hibron. So kaka kiran na si Amon a wata i Ahinowam a taga Yasriil;

3 Aya ikadowa na si Kiliyab a wata i Abigail a inikabalo i Nabal a taw sa Karmil; so ikatelo na si Absalom a wata i Maakah a aya wata a babay i Talmay a dato sa Gisor;

4 So ikapat na si Adoniyas a wata i Hagit; so ikalima na si Sipatiyas a wata i Abital,

5 Na so ikanem na si Itriyam a wata o karoma i Daod a si Iglah. Palaya siran inimbawata i Daod sii sa Hibron.

Tomiyampil si Abnir ki Daod

6 Sii ko masa a dii katidawa o ndatoan o pamiliya i Saolo ago so ndatoan i Daod na pepakaosoren i Abnir so kapaar iyan sii ko ndatoan i Saolo.

7 Aden gowani a sandil i Saolo a aya ngaran iyan na si Rispah a wata i Ayas. Miyakaisa a gawii na pitero i Isbosit ki Abnir a "Ino ngka perembanga so sandil o ama aken?"

8 Tanto a inikarangkit i Abnir angkai a pitero i Isbosit, na tig iyan a "Ba ako lagid o olo a aso a maampil ako sa Yodah? Taman imanto a gawii na magiiklas ako ko ndatoan i Saolo a ama a ka ago sii ko pamiliya niyan ago manga ginawai; na da ko seka pen palada ko kapaar i Daod. Apiya pen oto na pesenditan ako ngka imanto sa kasalaan mipantag sangkoto a babay!

9 Kamorkaan ako o Tohan sa tanto a maregen o di aken nggolalanan so kamapiyaan i Daod a inisepa on o Allah

10 A giya kakowaa niyan ko ndatoan ki Saolo ago so pamiliya niyan ago so kabaloya niyan ki Daod a dato sa Israil ago sa Yodah a ipoon sa Dan taman sa Birsiba."

11 Na da den makaraw somembag si Isbosit ki Abnir sa sataga bo a katero ka kagiya ipekelek iyan sekaniyan.

12 Oriyan ai na somiyogo si Abnir sa makatero ki Daod a tig iyan a "Antawaa i kiinged sangkai a inged? Pakipesadanowa ka raken, ka ogopan aken seka kaan reka mitampil so dalem a inged a Israil."

13 "Mapiya nan," a tig i Daod. "Makipepesadanowa ko reka, ogaid na satiman a ipenton aken reka: Di ka raken pekaadap taman sa di ngka raken mawit si Mikal a wata a babay i Saolo amay ka ndarpa ka raken."

14 Na somiyogo mambo si Daod sa makatero ki Isbosit na piyantonan iyan a tig iyan a "Began ka raken so karoma ko a si Mikal a siyonggodan aken sa betang a magatos timan a kobal ko sangoran o manga Pilistiyo."

15 Sabap roo na piyakikowa i Isbosit si Mikal a poon ko karoma niyan a si Paltiyal a wata i Lais.

16 Ogaid na tomiyondog on si Paltiyal a penggoraok taman den sa Bahorim. Mandiyadi na pitero on i Abnir a "Kasoy ka sa walay!" na miyaling sekaniyan.

17 Miyakimbitiyarai si Abnir ko manga pelokelokesen sa Israil a tig iyan a "Miyatey den a singaninen iyo a makandato rekano si Daod.

18 Na, nggolalanan iyo den imanto! Ka aya miyatero den o Allah makapantag ki Daod na 'Nggolalan ko oripen aken a Daod na pokasen aken so manga pagtaw aken a Israil ko kapaar o manga Pilistiyo ago sii ko kapaar o langon a ridoay iran.' "

19 Miyakimbitiyarai pen si Abnir ko manga taw sa mbatabataa a Baniyamin. Oriyan iyan na somiyong sekaniyan sa Hibron ka penotolen iyan ki Daod so langon taman a kebayaan nggolaola o Israil ago so langon a taw sa Baniyamin.

20 Kagiya makaoma si Abnir ki Daod roo sa Hibron a ped iyan so dowo polo kataw a mama na piselasela siran i Daod sa bangkiti.

21 Na pitero i Abnir ki Daod a "Pakalalakawa ko ngka nggagaan, kadnan ko a dato, kaan aken reka mapakatampil so langon o manga Israil kaan siran reka makipesadanowa, ago an ka makandato ko langon a masingayo o poso o ka." Na piyakalalakaw i Daod si Abnir na gomiyanat sekaniyan a da pakasakiti.

Biyono i Yowab si Abnir

22 Da peman matey na komiyasoy si Yowab ago so manga mama i Daod a poon ko kiyanggogobat iran a kipakaaawid siran sa madakel a miyateban. Ogaid na da roo den si Abner ki Daod sa Hibron ka miyapakalalakaw den i Daod a miyakaganat sekaniyan a da pakasakiti.

23 Na kagiya makaoma si Yowab ago so manga sondaro a ped iyan na miyatero on a miyakaoma den si Abnir ko dato na piyakalalakaw den o dato a gomiyanat sekaniyan a da pakasakiti.

24 Sabap roo na somiyong si Yowab ko dato a tig iyan on a "Antonaa angkai a pinggolaola ngka? Ilaya ngka man, ka miyakaoma reka si Abnir; ino ngka pekalalakawa

a miyaipos den sekaniyan!

25 Katawan ka si Abnir a wata i Nir! Aya inisong iyan sii na giya kaselibaa niyan reka ago so kaketokawi niyan ko manga olaola ngka ago so langon taman a pesowaan ka."

26 Na kagiya ganatan i Yowab si Daod na somiyogo sekaniyan sa makasono ki Abnir, na inikasoy iran a poon ko paridi sa Sirah. Ogaid na di ini katawan i Daod.

27 Kagiya mikasoy iran si Abnir sa Hibron na inisibay sekaniyan i Yowab ko kilid o gimowa a lagid o ba on makipembitiyarai sa masolen, na roo niyan siyaopi sabap ko kiyabonoo niyan ki Asahil a pagari niyan, ka giyonongan iyan si Abnir sa tiyan na miyatay.

28 Da matey kagiya maneg ai i Daod na pitero iyan a "Katawan den o Allah a saken ago so ndatoan aken na di den ketaksil sa taman sa pakataman mipantag ko kiyapatay i Abnir a wata i Nir.

29 Mitana ini ko olo i Yowab ago sii ko langon o pamiliya i ama iyan! Pengnin ko a di den kadaan so pekebabadan ki Yowab sa taw a pepanidoo, o di na pekebowa, o di na makateteken, o di na mapatay a pedang, o di na kakorangan sa pangenengken!"

30(Ka si Yowab ago so pagari niyan a Abisay na siyaopan iran si Abnir sabap ko kiyabonoo niyan ko pagari ran a Asahil ko kiyatidawa sii sa Gibiyon.)

Inilebeng si Abnir

31 Oriyan iyan na pitero i Daod ki Yowab ago so langon a ped iyan a "Kisia niyo so manga nditaren iyo na solot kano sa sako ago mbokoon iyo si Abnir." Na si den si dato Daod i tomotondog ko bangkay.

32 Inilebeng iran si Abnir sii sa Hibron, na gomiyoraok si Daod sa matanog sii ko kobor i Abnir. Na minggogoraok mambo so langon o manga taw.

33 Migay so dato sangkai a bayobayok a inindiyaga ki Abnir:

"Ino baden petay si Abnir a datar o lalong?"

34 Da mapatong so manga lima niyan, na da karantai so manga ai niyan.

Miyakakelit sekaniyan a miyatay a datar o miyapatay o manga rarata a mama."

Na giyoraokan sekaniyan peman o langon o manga taw.

35 Mababasa alongan sangkoto a gawii na petegelen o manga taw si Daod a koman sa pangenengken, ogaid na baden misepa a tig iyan a "Kamorkaan ako o Allah sa tanto a maregen o taam ako sa paan o di na apiya antonaa sa di pen kasedep o alongan!"

36 Na tiyanodan ai o langon a taw na miyasoat siran; mataan den a so langon a dii nggolaolaan o dato na ipekesoat iran.

37 Sangkoto a gawii na kiyasabotan o langon a pagtaw i Daod ago so langon a Israil a da den a kimamaniyai o dato ko kiyabonoo ki Abnir.

38 Na pitero o dato ko manga sanasanaan iyan a "Ba niyo di kesaboti a aden a kababantogan a olowan a miyatay sangkai a gawii sii sa Israil?"

39 Na apiya ako pen dato a miyapili o Allah na malobay ako imanto. Giyangkai a manga

wata i Siroyah na manga tangarasi a di aken keren. Midaneg o Allah ko dii nggolaola sa marata so manga rarata a pinggolaola niyan!"

2 SAMOWIL 4

Biyono si Isbosit

Kagiya maneg i Isbosit a wata i Saolo a miyatay si Abnir sii sa Hibron na kiyadaan den sa inam na miyanga aalek so langon o manga Israil.

2 Samaoto na aden a dow a kataw a sanasanaan i Isbosit a manga olowan o manga sagorompong a dii nggogobat. Aya manga ngaran iran na si Baanah ago si Rikab. Manga wata siran i Rimon a taga Birot ago ped ko mbatabataa a Baniyamin. (Ibibilang a Birot a ped ko inged a Baniyamin

3 Ka so andang a manga magiinged on na miyamagapas gowani sa Gitaim, na kibabaling siran roo a manga mananangga taman imanto.)

4 Aden pen a moriyataw i Saolo a so wata a mama i Yonatan. Aya ngaran iyan na si Mepibosit, na maatay so dow a mbala a ai niyan. Miyakalima ragon a idad iyan isako mabono si Saolo ago si Yonatan, na kagiya misampay so totol makapantag sii a poon sa Yasriil na piyorot sekaniyan o peritan on na inipalagoy niyan. Ogaid na sii ko di niyan dii kanggagaan gomanat na miyaroseng iyan baden si Mepibosit na miyabaloy a lepo.

5 Si peman si Rihab ago si Baanah na lomiyalakaw siran a song sa walay i Isbosit. Miyakaoma siran roo ko kararanti o alongan ko kadedeke i Isbosit ko kaoto o alongan.

67 Somiyoled siran ko look o walay a lagid o ba siran kowa sa arina, ogaid na kagiya makasoled siran on na miyamantek siran ko rowang i Isbosit a miiga roo a totorogen. Giyonongan iran sa tiyan na biyono iran, na piyotol iran on so olo niyan. Initelon iran ai na miyalagoy siran a lomiyalakaw ko miyababasa gawii a sii siran miyokit ko Kapantaran sa Yordan.

8 Inowit iran so olo niyan ki Daod sii sa Hibron na pitero iran ko dato a "Katii so olo i Isbosit a wata o ridoay ngka a si Saolo a miyananamar ko niyawa ngka. Imanto a gawii, kadnan ko a dato, na inisaop ka o Allah sii ki Saolo ago so kiyababandan on."

9 Simbag i Daod si Rikab ago so pagari niyan a si Baanah a "Matamataan ko kaooyagoyag o Allah a miyanabang ko niyawa ko ko langon a karomasayan

10 Ka isako teroon raken o isa a mama a 'Miyatay si Saolo,' a aya katao niyan on na kiyawitan ako niyan sa mapiya a totol na diyakep aken sekaniyan ago biyono aken sii sa Siklag. Giyanan i kiyabadali aken on ko 'mapiya a totol' iyan!

11 Aya pen amay ka mamono so manga rarata a taw sa da a peleng iyan a mama a miiga ko igaan iyan sii ko walay niyan! Ba aken sekano di seopi imanto ko kiyabonoo niyo ron a peyopasen ko sekano ko doniya?"

12 Na siyogo i Daod so manga mama niyan na biyono iran siran. Piyamotol iran on so manga lima iran ago manga ai, na binitin iran so manga lawas iran ko obay o ranaranaw sii sa Hibron. Ogaid na kinowa iran so olo i Isbosit na inilebeng iran ko libengan ki Abnir sii sa Hibron.

2 SAMOWIL 5

Miyabaloy si Daod a Dato sa Israil

Samaoto na somiyong so langon a mbatabataa sa Israil ki Daod sii sa Hibron na pitero iran on a "Isaisa so rogo tano.

2 Gowani pen sii ko kandatatoi rekami pen i Saolo na seka i pepegolowan ko manga sondaro a Israil ko kanggogobat iran. Na pitero reka o Allah a 'Seka i pekatagikor ko manga pagtaw aken a Israil na kebaloy ka a dato iran.' "

3 Na kagiya makaoma so langon a pelokelokesen sa Israil ko dato Daod sii sa Hibron na miyakipesadanowa sekaniyan kiran roo sii ko hadapan o Allah na siyalawatan iran si Daod a madato sa Israil.

4 Miyakatelo polo ragon a idad i Daod kagiya mabaloy a dato na miyakandato sekaniyan sa miyakapat polo ragon.

5 Sii sa Hibron na miyakandato sa Yodah ko miyakapito ragon ago nem olan, na sii sa Yarosalim na pindatoan iyan so dalem a Israil ago giya Yodah sa miyakatelo polo ago telo ragon.

Tiyaban i Daod a Yarosalim

6 Da matey na somiyong so dato Daod ago so manga sondaro niyan sa siti a Yarosalim ka nggobaten iran. So kibabaling roo a manga Hibosiyo na aya katao iran on na di on pekasoled si Daod, na pitero iran on a "Di ka sii pekasoled; apiya so manga bota ago manga lepo na pagerenen ka iran!"

7 Apiya pen oto na miyaagaw i Daod so kokotaan iran a Siyon, a giyanan so Siti o Daod.

8 Ka miyatero i Daod sangkoto a gawii ko manga mama niyan a "Apiya antawaa rekano i kebaya mono ko manga Hibosiyo na sii pekaokit ko kakar a ig sa kanggobata niyan sangkoto a 'manga bota ago manga lepo' a manga ridoay aken!" (Giyanan i sabap a di on dii kateroa sa "So bota ago so lepo na di pekasoled ko torogan o dato.")

9 Kagiya matangan i Daod angkanan a kota na komiyaden roo na bitowan iyan sa "Siti o Daod." Na pimbabalayan iyan so darpa ko melilibeta on ipoon ko Milo a ipegagaw tampar sa siti.

10 Na pepangosor so gees i Daod ka sisii rekaniyan so Allah a Mamaapaar a Tohan.

11 Samaoto na si Hiram a dato sa Tiro na somiyogo ki Daod sa manga mama a kipakaaawid sa manga tarakayo a sidro, ago manga panday sa kayo ago ator, na inibalay iran si Daod sa torogan.

12 Na siyabot i Daod a piyakambeken sekaniyan o Allah a dato sa Israil ago inipangkat o Allah so ndatoan iyan sabap ko manga pagtaw niyan a Israil.

13 Kagiya makatepas si Daod sa Yarosalim a poon sa Hibron na ron sekaniyan kominowa sa ped pen a manga sandil ago manga karoma, na aden pen a manga wata a manga mama ago manga babay a inimbabawata iyan.

14 Giyai so manga ngaran o manga wata a inimbabawata iyan roo: siki Samowa, Sobab, Natan, Solaiman,

15 Ibhar, Ilisowa, Nipig, Yapiya,
16 Ilisama, Iliyada ago si Ilipelet.

Tiyaban i Daod so manga Pilistiyo

17 Kagiya maneg o manga Pilistiyo a miyabaloy si Daod a dato sa Israil na lomiyalakaw so langon a sondaro iran sa kandakepa iran on. Ogaid na miyaneg ai i Daod na tomiyondagay ko kokotaan a darpa.

18 Miyakaoma den so manga Pilistiyo ko Balintad sa Ripaim na roo siran mikempo.

19 Kagiya ka maoto na inisean i Daod so Allah a tig iyan a "Ba aken nggobata so manga Pilistiyo? Ba ngka siran raken pekitabanen?"

"Oway, gobata ngka!" a inisembag o Allah. "Ka mataan den a pekitaban aken reka so manga Pilistiyo!"

20 Sabap roo na somiyong si Daod sa Baal Pirasim na miyataban iyan siran roo. Na tig iyan a "Diyasengan o Allah so manga ridoay aken sii ko hadapan aken a datar o bagiyaw." Giyoto i kiyabetowi sangkoto a darpa sa 'Baal Pirasim.'

21 Inawaan roo o manga Pilistiyo so manga barahala iran, na piyangowa siran i Daod ago so manga mama niyan.

22 Da peman matey na miyakaoma peman so manga Pilistiyo sa Balintad sa Ripaim na mikempo siran on.

23 Sabap roo na inisean i Daod so Allah na somimbag sekaniyan a tig iyan a "Di niyo siran penteka, ka alibeta niyo siran baden na go niyo sondoli ko katatalikodan iran a marani ko manga kayo a balsam.

24 Na so den so kapakaneg iyo sa dalapek o pelalakaw sii ko poro o manga kayo a balsam na gobata niyo siran ka aya maana niyan na pepangonaan rekano so Allah sa katebana niyan ko manga sondaro a Pilistiyo."

25 Na ininggolalan i Daod so inisogo on o Allah na piyamoto iyan so manga Pilistiyo ipoon sa Giba taman den sa Giser.

2 SAMOWIL 6

Inowit sa Yarosalim so Kaban sa Kapasandan

Linimod peroman i Daod so piyamaraw ko manga mama sa Israil a telo polo nggibo langon

2 Na piyakaonot iyan siran sa Baalah sii sa Yodah a ron iran kowaa so Kaban sa Kapasandan o Tohan a bebetowan sa Ingaran o Allah a Lebi a Mamaapaar a kokorsi ko poro o piyagtaotaw a manga malaikat a matatago ko lekeb o Kaban.

3 Kinowa iran so Kaban o Tohan ko walay i Abinadab a sisii ko bobongan na riyoran iran ko bago a karo. Si Osah ago si Ahiyo a manga wata i Abinadab na penanakodaan iran so karo

4 A ndodon so Kaban a pangongonaan i Ahiyo.

5 Si Daod ago so langon o manga Israil na palaya dii selasela ago dii mamagidaida a rakes o langon a bager iran sii ko hadapan o Allah. Di siran dii mboboniboniyon sa manga alpa, manga kotiyapi, manga garingking, manga bogiyong ago manga pandaopan.

- 6** Kagiya makaoma siran ko pegegikan i Nakon na minisosong so manga sapi, na biter i Osah a lima niyan ka ineren iyan so Kaban o Tohan.
- 7** Na somiyokeyaw so gani o Allah ki Osah sabap ko kiyaribat iyan; na siniksa sekaniyan o Tohan na miyatay sekaniyan roo ko kilid o Kaban.
- 8**(Sabap roo na pambetowan angkoto a darpa sa 'Piris Osah' taman imanto a gawii.)
Inikararagit i Daod so kiyamborngat o gani o Allah ki Osah,
- 9** Na inikalek iyan so Allah sangkoto a gawii a tig iyan a "Andamanaya den i kakewita ko pen ko Kaban o Allah ko kakadenan ko?"
- 10** Miyapamikir iyan a di niyan den iteros ai mawid taman sa siti a Yarosalim na inisilay niyan baden ka tiyago iyan ko walay i Obid Idom a taw sa Gat.
- 11** Miyakatelo olan a katatago o Kaban o Allah roo ko walay i Obid Idom, na riyakmatan sekaniyan o Allah a rakes o langon o pamiliya niyan.
- 12** Na miyatero ko dato Daod a "Rarakmatan o Allah so pamiliya i Obid Idom ago so langon taman iyan sabap ko Kaban o Tohan." Kagiya ka maoto na somiyong si Daod ko walay i Obid Idom na kinowa niyan on so Kaban o Tohan ka pagowiten iyan sa Yarosalim a sarta o kapekebabaya.
- 13** Kagiya makalakad sa miyakanem so manga taw a maawid ko Kaban na piyakatareg siran i Daod ka mikorban si Daod sa mama a sapi ago so kaolit a nati a sapi.
- 14** Na si Daod a titinambed sa sotra a dinis na dii segayan ko hadapan o Allah a rakes o langon a bager iyan
- 15** Sii ko kapegowita niyan ko Kaban o Allah sa Yarosalim a pegonot on so langon o manga Israil a di siran dii mameseg ago dii mamamogiyong.
- 16** Sii den ko kipesoleden iran ko Kaban o Allah sa siti na si Mikal a wata a babay i Saolo na sisii ko rowasan a di niyan siran dii mbantayan. Na kagiya mailay niyan si Daod a dii tepak ago dii sesayasayaw ko hadapan o Allah na pisodi iyan sii ko poso iyan.
- 17** Inawidan iran so Kaban na inibetad iran ko darpa iyan sii ko soled o barombarong a biyanganon i Daod a tegoan on. Na somiyapaat si Daod ko Allah sa manga korban a petotongen ago manga korban pantag bo ko kanggiginawai.
- 18** Kagiya mapasad iyan ai somapaat na inipangangarapan iyan so manga taw sii ko Ingaran o Allah a Lebi a Mamaapaar
- 19** Na piyamegan iyan sa pangenengken so langon a malilimod a manga Israil ndatar so mama ago babay. Bigan iyan so oman i isa kiran sa satiman a paan, satompi a korma ago satompi a pasas. Oriyan iyan na mimbabaling so langon a taw ko walay iran.
- 20** Kagiya maling si Daod sa kaperakmati niyan ko pamiliya niyan na lominiyo si Mikal ka inalaw niyan a tig iyan a "Sayana a kiyapakibantogen o dato sa Israil sa ginawa niyan sangkai a gawii ko kiyalekas iyan sa nditaren sii ko kapegilaya on o manga raga o manga sanasanaan iyan a datar o dii nggolaolaan o da a kaya iyan a mama!"
- 21** Na pitero i Daod ki Mikal a "Sii oto ko hadapan o Allah a tiyomo ako niyan a di so ama a ka aya pen o ba so apiya antawaa ko pamiliya niyan isako itoro ako niyan a madato ko manga pagtaw niyan a Israil. Na ipendayon aken den so di aken dii kaselasela ko

hadapan o Allah,

22 Na mbalowin ko a ginawa ko a lebi pen a makep a di giyai, na pepekangalimbabaan ako sii ko kapegilaya ko sa ginawa ko. Ogaid na kipangkat ako angkoto a manga raga a pitero o ka."

23 Na da a wata i Mikal a wata i Saolo taman ko kaoyagoyag iyan.

2 SAMOWIL 7

So Initopa o Allah ki Daod

Kagiya makatikna den so dato Daod ko torogan iyan na bigan den o Allah sa kalilintad ko langon a ridoay niyan ko mbalabala.

2 Samaoto na pitero iyan ko nabi Natan a "Katii ako bo a mababaling ko torogan a inembaalan a kayo a sidro, ogaid na so Kaban o Tohan na matatago pen ko barombarong!"

3 Na pitero i Natan ko dato a "Apiya antonaa i mapipikir ka na nggolalanen ka den, ka sisii reka so Allah."

4 Ogaid na sii den sangkoto a kagagawii na minitoron ki Natan so katero o Allah a tig iyan a:

5 "Ika roo na go ngka teroa ko oripen aken a Daod a giyai i pitero o Allah: 'Kena a ba seka i mbengon sa walay a mbelingan ko.

6 Ipoon ko gawii a kiyapakaliyowa ko ko manga Israil sa Misir taman imanto na da ako den baling sa walay, ka di ako dii tetepatepas ko manga darpa a aya pekedenan ko na barombarong.

7 Sii ko langon a peketepasan aken a ped o manga Israil na so langon a olowan iran a siyogo aken sa katagikora ko manga pagtaw aken a Israil na da den a isa kiran bo a ba aken pagisei o ino ako niyan da mbalain sa walay a kayo a sidro.'

8 "Na teroa ngka imanto ko oripen aken a Daod a 'Giyai i pitero o Allah a Lebi a Mamaapaar: Kinowa ko seka poon ko kapetegikor ka sa manga bilibili sii ko pananateba na biyaloy aken seka a olowan o manga pagtaw aken.

9 Sisii ako reka apiya anda ka miyakasong, na piyanaban aken so langon a ridoay ngka sii ko kapegantap ka kiran. Imanto na pekibantog aken so Ingaran ka a datar o ngaran o lebi a kababantogan a manga taw ko doniya.

10-11 Pitiyagaran aken sa darpa so manga pagtaw aken a Israil na piyamola aken siran on kaan siran makabaling ko inged iran a di den keringasa. Inipoon den ko kiyapakasoled iran on sii ko masa a kiyatoro aken sa manga makapengokom ko manga pagtaw aken a Israil na perarasain siran o manga rarata a taw, ogaid na di den ai mapenggolaola. Na pekadekeen ko seka pen ko langon a ridoay ngka.'

"Liyo ron pen na piyayag reka o Allah a mbegan ka niyan sa manga moriyataw, ka tig iyan a

12'Amay ka mapopos so manga gawii ngka a mitapi ka ko manga apo o ka na pakapendatoon ko so isa ko manga wata a ka a makasambi reka, na pekabageren ko so ndatoan iyan.

13 Na sekaniyan den i mbangon sa timplo a kibantog ko Ingaran aken, na pakapembekenen ko so dii kandato o kebabadan on sa taman sa pakataman.

14 Saken i keama iyan na sekaniyan i kewata aken. O makanggolaola sa bibid na ndenegon ko a datar o ama a pelambit ko wata iyan.

15 Ogaid na di aken on mbelagen so limo aken a datar o kiyabelaga ko ron ki Saolo a inipilak aken kaan ka madato.

16 So pamiliya ngka ago so ndatoan ka na ketatap sa taman sa pakataman sii ko hadapan aken, na makapembeken so korsi i ka sa dayon sa dayon.' "

17 Na piyanotol i Natan ki Daod angkai langon a miyapayag rekaniyan o Allah.

So Pangangarapan i Daod a Kapanalamat

18 Oriyan iyan na somiyoled si Daod ko Barombarong a dii Telabokan na miyontod ko hadapan o Allah na pitero iyan a:

"Antawaa ko, ya Allah a Kadnan ko, ago antonaa i pamiliya ko a kena a ba kami mapapatot sangkai a kinipangkaten ka raken?"

19 Ogaid na maito ini a pinggolaola ngka sii ko kapipikira ngka on, ya Allah a Kadnan ko, ka pitero o ka pen so makapantag ko keoriyan ko kebabadan raken! Ba giyai i kalilid a ipekidia ngka ko manosiya, ya Allah a Kadnan ko?

20 "Antonaa pen i mapetero aken reka! Ka katawan ako ngka a oripen ka, ya Allah a Kadnan ko.

21 Sabap ko initopa ngka ago mipepasod ko kabaya a ka na pinggolaola ngka ngkai a mala a nganin, na piyakitokawan ka raken den a oripen ka.

22 "Sayana ka a mipapangkat, ya Allah a Kadnan ko! Da den a ba ngka lagid; na katawan ami so pekeneg o manga tangila mi a da den a Tohan a rowar reka.

23 Na antawaa i datar o manga pagtaw ngka a Israil? Giyanan bo i nasiyon ko doniya a miyaaon ka, hey Tohan ko, kaan siran mabaloy a manga kaom ka ago an mabantog so Ingaran ka a nggolalan ko manga ala ago piyakamemesa a pinggolaola ngka kiran. Ka piyamogaw ngka so ped a manga nasiyon a rakes o manga katohanan iran sii ko pegantapan o manga pagtaw ngka a miyapakaliyo ngka sa Misir.

24 Piyakambeken ka so manga Israil a rek ka den a manga taw sa taman sa pakataman, na seka, ya Allah, i miyabaloy a Tohan iran.

25 "Imanto den, ya Allah a Tohan ko, na tomanen ka sa taman sa pakataman so pitero o ka makapantag raken a oripen ka ago so kebabadan raken. Nggolalanen ka so initopa ngka

26 Kaan mabantog so Ingaran ka sa dayon sa dayon. Amay ka magiyoto na mapetero o manga taw a 'So Allah a Lebi a Mamaapaar na aya Tohan sii sa Israil!' Na so pamiliya i Daod a oripen ka na makapembeken ko hadapan ka.

27 "Ya Allah a Lebi a Mamaapaar a so Tohan o Israil na miyapayag ka ini langon sii raken a oripen ka a tig ka a 'Mbegon ko seka sa manga moriyataw a manga babaloy a dato.' Sabap roo na kiyaoyatan ako sa kiniadapen aken reka sangkai a pangangarapan.

28 “Ya Allah a Kadnan ko, seka i Tohan! Kasasarigan so manga katero o ka, na initopa ngka raken angkai a kamapiyaan.

29 Kagiya ka maoto na pengnin ko imanto a ikasoat ka so karakmati ngka ko pamiliya ko kaan matatap sii ko hadapan ka. Ya Allah a Kadnan ko, seka i tomiyopa sii, na nggolalan ko rakmat ka na perakmatan so pamiliya ko sa taman sa pakataman.”

2 SAMOWIL 8

So dii Kapakitidawa i Daod

Oriyan ai sii ko kapepamanagad o manga gawii na giyobat paman i Daod so manga Pilistiyo na tiyaban iyan siran, na piyokas iyan so inged ko kapaar iran.

2 Tiyaban pen i Daod so manga Mowabiyo. Piyamakaiga iyan siran ko lopa na piyanakes iyan siran a tali. Oman i madowa takes kiran na pembonoon, na so ikatelo a takes na pakapepagoyagen. Na miyasekop i Daod so manga Mowabiyo na pepekabowis siran on.

3 Liyo ron pen na tiyaban i Daod so dato sa Sobah a si Hadadisir a wata i Rihob sii ko kapelalakaw i Hadadisir sa kipagasalen iyan ko kapaar iyan ko manga inged a midadair ko lawasaig a Yopratis.

4 Diyakep i Daod so sanggibo ko manga karo niyan sa katidawa ago pito nggibo a komakaro a rakes o dowo polo nggibo a manga sondaro. Pilelepo iyan so langon o manga koda a tomotoyok ko karo a liyo ko magatos timan on.

5 Na somiyogo so manga Isiriyon sii sa Damaskos sa manga sondaro sa kapenabangi ran ki Hadadisir, ogaid na giyobat siran i Daod na piyamoto iyan so dowo polo ago dowo nggibo kiran.

6 Tiyagoan iyan a inged a Siriya sa manga kampo a sondaro na miyasekop iyan siran a pepekabowis on. Na migay so Allah ki Daod sa kapakataban apiya anda sekaniyan pesengor.

7 Piteban i Daod so manga kelong a bolawan a rek o manga olowan i Hadadisir na inowit iyan ai sa Yarosalim.

8 Kominowa sekaniyan pen sa tanto a madakel a tombaga a poon sa Bitah ago giya Birotay a manga inged a dii ndatoan i Hadadisir.

9 Kagiya maneg i Toy a dato sa Hamat a tiyaban i Daod so langon a sondaro i Hadadisir

10 Na siyogo iyan so wata iyan a si Yoram ko dato Daod sa kaselama niyan ago kaselaa niyan on ko kiyatabana niyan ki Hadadisir ko katidawa, ka dii mambo makitidawa si Toy ki Hadadisir. Na inowitan i Yoram si Daod sa manga pamemegayan a bolawan, pirak ago tombaga.

11 Inisenggay ini i Daod a rek o Allah a datar o inikidia niyan ko manga bolawan ago pirak a poon ko langon a nasiyon a miyasekop iyan

12 A giya Idomiya,giya Mowab, so manga Isiriyon, so manga Pilistiyo ago so manga Amalik. Inisenggay niyan on pen so miyateban iyan a poon ki Hadadisir a dato sa Sobah.

13 Na miyangosor den so bantogan i Daod kagiya makakasoy a poon ko kiyapamonoa niyan ko sapolo ago walo nggibo a manga taw sa Idomiya sii ko Balintad a Timos.

14 Tiyagoan iyan a dalem a inged a Idomiya sa manga kampo a sondaro, na miyasekop i Daod so langon a Idomiyen. Na migay so Allah ki Daod sa kapakataban apiya anda pesengor.

So manga Sanasanaan i Daod

15 Dii ndatoan i Daod so dalem a Israil a aya di niyan dii indato ko langon a pagtaw niyan na so kokoman ago kaontol.

16 Si Yowab a wata i Siroyah na aya olowan o manga sondaro; si Yahosapat a wata i Ahilod na aya komikibir ko manga rikord;

17 Si Sadok a wata i Ahitob ago si Ahimilik a wata i Abiyatar na aya manga imam; si Sirayas na aya panonorat;

18 Si Binayas a wata i Yahoyada na aya olowan o manga gordiya i Daod; na so manga wata i Daod a manga mama na manga mosawira o dato.

2 SAMOWIL 9

Si Daod ago si Mepibosit

Miyakaisa a gawii na iniise i Daod o ba aden pen a lamba ko pamiliya i Saolo a mikalimo iyan sabap ki Yonatan.

2 Samaoto na aden a talasogoay o pamiliya i Saolo a aya ngaran iyan na Siba. Piyakisogoan iran a domarpa ki Daod, na iniise on o dato a "Ba seka si Siba?" "Oway, oripen ako ngka," a inisembag iyan.

3 Na iniise o dato a "Ba aden pen a miyalamba ko pamiliya i Saolo a mapakiilay aken on so limo o Tohan?" Tig i Siba a "Aden pen a wata i Yonatan a malelepo so mbala a ai niyan."

4 "Anda sekaniyan?" a iniise o dato. "Ndodoo sekaniyan ko walay i Makir a wata i Amiyal sii sa Lo Debar," a inisembag i Siba.

5 Mandiyadi na piyakirapit sekaniyan i Daod a poon sa Lo Debar sii ko walay i Makir a wata i Amiyal.

6 Kagiya makaoma ki Daod si Mepibosit a wata i Yonatan a aya wata i Saolo na somiyodiyod sekaniyan ki Daod a piyagadatan iyan. Pitero i Daod a "Mepibosit!" "So den so oripen ka," a inisembag iyan

7 "Di ka pekelek," a tig i Daod, "ka matamataan a ikelimo aken seka sabap ko ama a ka a si Yonatan. Ikesoy aken reka so langon a lopa a miniganat o apo o ka a dato a si Saolo, na lalayan ka pekakan sii ko lamisaan aken."

8 Somiyodiyod peman si Mepibosit a tig iyan a "Antonaa i kipantag aken a oripen ka a aya sabap angkai a kiyasabapan sangkai a kiyainengkaa ngka raken a matag ako baden lagid o maatay a aso?"

9 Mandiyadi na piyakitawag o dato si Siba a talasogoay i Saolo na pitero iyan on a "Inibegay aken ko apo o kadnan ka so langon taman a rek i Saolo ago so pamiliya niyan.

10 Seka ago so manga wata a ka a manga mama ago so manga oripen ka na palaya kano makapembasok sa lopa para rekaniyan na pegowiten iyo ron so pekeragon on kaan kaadeni sa pangenengken so pamiliya o kadnan ka a si Saolo. Ogaid na si Mepibosit na lalayon pepekakan sii ko lamisaan aken." (Si Siba na sapolo ago lima i wata a mama ago dow a polo a oripen iyan.)

11 Na pitero i Siba a "Ipenggolalan aken, kadnan ko a dato, so langon taman a inisogo o ka raken a oripen ka." Na sii pepekakan si Mepibosit ko lamisaan o dato a datar o isa ko manga wata o dato.

12 Aden a wata i Mepibosit a bago a mama a aya ngaran iyan na si Mika, na so langon a maaped ko pamiliya i Siba na palaya manga talasogoay i Mepibosit.

13 Na si Mepibosit a lepo so mbala a ai niyan na sii mababaling sa Yarosalim ka lalayon pepekakan sii ko lamisaan o dato.

2 SAMOWIL 10

Tiyaban i Daod so manga Amoniyo ago so manga Isiriyan

Sii ko kapepamanagad o manga gawii na miyatay so dato o manga Amoniyo, na so wata iyan a si Hanon i miyakasambi on a dato.

2 Miyapamikir i Daod a "Ipengginawai aken si Hanon a datar o kiningginawain raken o ama iyan." Na somiyogo si Daod sa manga mama a makatibaw ki Hanon sabap ko kiyapatay o ama iyan.

Kagiya makaoma siran ko inged o manga Amoniyo

3 Na so manga pelokelokesen a Amoniyo na pitero iran ki Hanon a kadnan iran a "Ba aya katao ngka on na seselaan i Daod so ama a ka ko kiyasogoa niyan reka sangkai a manga mama sa katibaw iran reka. Kena! Ka siyogo siran reka i Daod a makapenoriman ko siti kaan iran magobat ago masakop!"

4 Na piyakidakep i Hanon so manga siyogo i Daod na piyangopawan iyan sa sesaopak ko manga sompa iran ago piyanabas iyan so kababaan ko manga kimon iran kaan kasawai so manga pitot iran na go niyan bo pakalalakawa.

5 Tanto siran a kiyayaan sa kapembaling iran, na kagiya maneg i Daod so miyanggolaola na somiyogo sekaniyan sa makabalak kiran a tig iran a "Tareg kano roo sa Yariko taman sa mamakato so manga sompa iyo na go kano bo baling."

6 Kagiya katokawan o manga Amoniyo a mimbalo y siran a ipekesisingay i Daod na tomindan siran sa dow a polo nggibo a manga sondaro a Isiriyan a poon sa Bit Rihob ago giya Sobah ago so pen so sanggibo a manga mama a poon ko dato sa Maakah, ago sapolo ago dow a nggibo a poon sa Tob.

7 So kiyanega sii i Daod na siyogo iyan si Yowab a rakes o langon a sondaro niyan sa kipetidawaan iran kiran.

8 Mililiyo so manga Amoniyo na mitiyagar siran makitidawa a romarantar sii ko gimowa o siti ran, na so peman so manga Isiriyen a poon sa Sobah ago giya Rihob ago so pen so manga mama a poon sa Tob ago Maakah na kisisibay a sisii ko liyo o siti.

9 Miyailay i Yowab a aden a nggobat rekaniyan sii ko onaan iyan ago sii pen sa talikodan; sabap roo na piyagaraw niyan so lebi a manga papasang a sondaro sii sa Israil na aya niyan piyakasarempang ko manga Isiriyen.

10 Piyakipagolowanen iyan so lamba a manga sondaro ko pagari niyan a si Abisay, na piyakasarempang iyan siran ko manga Amoniyo.

11 Na pitero on i Yowab a "O mailay ngka a di ako pekaato ko manga Isiriyen na panabangi ako ngka, ogaid na o di ka pekaato ko manga Amoniyo na penabangan ko seka.

12 Pakababager kano; ipangato tano so manga taw tano a Israil ago so manga inged o Tohan tano. Pengnin ko a minggolalan so kabaya o Allah!"

13 Na giyoto a somiyorong si Yowab ago so manga sondaro niyan sa kanggobata iran ko manga Isiriyen, na piyalagoyan iran sekaniyan.

14 Kagiya mailay o manga Amoniyo a miyamalagoy so manga Isiriyen na piyalagoyan iran mambo si Abisay ka miyamagapas ko siti. Kagiya ka maoto na gominek makitidawa si Yowab ko manga Amoniyo na komiyasoy sa Yarosalim.

15 Kagiya mailay o manga Isiriyen a tiyaban siran o manga Israil na tinimo iran so kalangolongon o manga sondaro iran.

16 Na piyakisogoan i Hadadisir so manga Isiriyen a makalelepas ko lawasaig a Yopratis, na miyakaoma siran sa Hiram a penanakodaan i Sobak a komandir o manga sondaro i Hadadisir.

17 Kagiya matero ini ki Daod na tinimo iyan so langon a sondaro a Israil na rominipag siran sa lawasaig a Yordan a somiyong sa Hiram. Romiyantar so manga Isiriyen a somasarempang ki Daod na initidawa iran sekaniyan.

18 Ogaid

na piyalagoyan iran bo so manga Israil, na miyakapatay si Daod sa pito gatos ko kikakaro iran ago pat polo nggibo a kikokoda. Piyalian iyan pen si Sobak a komandir o manga sondaro iran a aya niyan den inipatay.

19 Kagiya mailay o langon a dato a mipapaar i Hadadisir a miyataban siran o Israil na piyangangapinan iran so manga Israil na miyakisakop siran kiran. Na miyalek den so manga Isiriyen o ba iran peman abanga so manga Amoniyo.

2 SAMOWIL 11

Si Daod, si Batsiba ago si Oriyas

Sii ko pangolaon a masa a kapelalakaw o manga dato sa kapakipetidawa iran na siyogo i Daod si Yowab a rakes o manga sanasanaan iyan ago so langon a sondaro a Israil.

Bininasa iran so manga Amoniyo na linikopan iran so siti a Rabah. Ogaid na tetalimbagak si Daod sii sa Yarosalim.

2 Miyakaisa a gagawii na mimbawat si Daod ko igaan iyan na somiyong ko pantar a atep o torogan iyan. Sii ko di niyan on dii kandadalakaw na kiyatolongan iyan a babay a dii peigo sii ko walay niyan. Tanto a mataid angkoto a babay

3 Na somiyogo si Daod sa makapangingise sa makapantag rekaniyan. Tig o siyogo a "Giyanan si Batsiba a wata i Iliyam ago karoma i Oriyas a Hitiyo."

4 Na somiyogo si Daod sa makarapit rekaniyan. Miyakaoma on so babay na rimbang i Daod. (Aya den kiyasotiya o babay sa ginawa niyan poon ko kiyadalem iyan a hadas.) Oriyan iyan na miyaling bo so babay sa walay.

5 Da matey na kiyatokawan iyan a miyaogat sekaniyan na piyakitero iyan ki Daod.

6 Sabap roo na piyakitero i Daod ki Yowab a "Pakasonga ngka raken si Oriyas a Hitiyo." Na piyakasong sekaniyan i Yowab ki Daod.

7 Kagiya makaoma si Oriyas na iniise on i Daod o antonaa i kapakambebedad i Yowab ago so manga sondaro ago makapantag ko pekebolosan o katidawa.

8 Oriyan iyan na pitero iyan ki Oriyas a "Song ka ko walay ngka na deke ka pasin." Na giyanatan i Oriyas so torogan na aden a initondog on o dato a pamemegayan.

9 Ogaid na da baling si Oriyas ka sii baden miyakatorog ko gimowa o torogan o dato a ped o langon a talasogoay o kadnan iyan.

10 Kagiya matero ki Daod a "Da song si Oriyas ko walay niyan," na iniise on i Daod a "Ba kena a aya ngka den kiyapakapoon sa mawatan? Ino ka da baling?"

11 Tig i Oriyas a "So manga Israil ago so manga taw sa Yodah na palaya makakakaden ko manga barombarong na ndodoo kiran so Kaban sa Kapasadan; na so olowan aken a si Yowab a ped iyan so manga pagtaw o kadnan aken na kikakampo ko manga pangomaan. Andamanaya i kambaling aken ko walay aken a kan ago maginom ako ron na taros a perembangen ko so karoma ko? Matamataan ko kaoyagoyag ka, ka di aken den anan mapenggolaola!"

12 Mandiyadi na pitero on i Daod a "Kaden ka sii sa salongan pen na pakakasowin ko seka mapita." Komiyaden si Oriyas roo sa Yarosalim sangkoto a gawii ago sii ko telondog on,

13 Na miyaki pagatoang on si Daod na bireg iyan. Ogaid na kagiya magagawii na da den baling si Oriyas ko walay niyan ka lominiyo baden sa kapekatorog iyan ko dempas iyan a ped o manga talasogoay o kadnan iyan.

14 Sii ko kiyapita iyan na pisoratan i Daod si Yowab na inipakawit iyan ai a nggolalan ki Oriyas.

15 Aya inisorat iyan na "Tagoa ngka si Oriyas ko panempang o manga sondaro a ron tanto a maregen so katidawa na go ngka awai kaan mapana ago matay."

16 Sabap roo sii ko kalilikopi i Yowab ko siti na tiyago iyan si Oriyas ko darpa a katawan iyan a ndodon so lebi a manga babager a pepangeren ko siti.

17 Na kagiya meliliyo siran ko siti a makipetidawa ki Yowab na miyapatay iran so ped ko manga sondaro i Daod, na miyatay mambo si Oriyas a Hitiyo.

18 Oriyan iyan na somiyogo si Yowab sa makapanotol ki Daod ko langon a miyasowasowa ko katidawa.

19 Ininsaratan iyan so sogo a tig iyan a "Amay ka mapasad ka manotol ko dato so langon a miyasowasowa ko katidawa

20 Na baanda kerarangiti so dato na ipagise iyan reka a 'Ino niyo tanto a ndasega so siti ko kiyapakitidawa iyo ron? Ba niyo di katawi a penaan kano iran a poon ko kota iyan?

21 Ba ngka di ketademi o antawaa i miyono ki Abimilik a wata i Gidiyon? Babay anan a miolog on sa galingan a ator a poon ko pangeleban a aya niyan inipatay roo sa Tibis. Ino kano tanto a ndaseg ko kota?' O iise iyan reka ini na teroa ngka on a 'So pen so oripen ka a si Oriyas na miyatay.'"

22 Na gomiyanat den so siyogo na kagiya makaoma ki Daod na kiyasoy niyan on so langon taman a pakipenotol on i Yowab

23 A tig iyan a "Lebi rekami a mabager so manga ridoay ami ka liniyowan kami ran a poon ko siti sa kapakipetidawa iran rekami ko pangomaan, ogaid na minidendeg ami siran peto ko gimowa o siti.

24 Na giyoto a piyamana kami ran a poon ko kota na miyamatay so ped ko manga sondaro ngka; na miyatay mambo so oripen ka a si Oriyas a Hitiyo."

25 Na pitero i Daod ko siyogo a "Teroa ngka ki Yowab a 'O ba ngka ini aawiden a akal, ka di den ketendo o ba giyai o di na giyanan a taw i kebono sii ko katidawa. Dasaa ngka sebenar gomobat so siti na binasaa ngka!' Teroa ngka ini ki Yowab a ipagoyat on."

26 Kagiya maneg o karoma i Oriyas a miyatay so karoma niyan na inimboko iyan.

27 Kagiya mapasad so kiyandiyagai niyan on na piyakirapit sekaniyan i Daod ko torogan iyan na miyabaloy a karoma niyan, na mimbawata ki Daod sa mama. Ogaid na so pinggolaola i Daod na inikarata a ginawa o Allah.

2 SAMOWIL 12

Pimbongetan i Natan si Daod

Siyogo o Allah so nabi Natan ki Daod. Kagiya makaoma on na pitero iyan a "Aden a dow a kataw a mama ko isa a inged. So isa on na kawasa na so isa peman na miskin.

2 So kawasa na tanto den a madakel i bilibili, kambing ago sapi.

3 Ogaid na da a ba rek o miskin a rowar ko satiman a nati a bilibili a piyamasa niyan. Inoyag iyan na miyakala ini sii ko walay niyan a ped o manga wata iyan. Pepekakan ai ko pangenengken iyan ago pepekainom ko tagayan iyan na pepektorog pen sii ko bobon iyan. Na datar o ba niyan wata a babay.

4 "Miyakaisa a gawii na aden a miyakaoma a lomalayag a pembisita ko kawasa a mama. Na di niyan kabaya i ba niyan sombalia so apiya isa ko bilibili niyan o di na sapi a ipagana niyan ko lomalayag, na kinowa niyan baden so nati a bilibili o miskin na aya niyan pitiyagar ko mimbisita on."

5 So kiyanega sii i Daod na tanto niyan a kiyararangitan angkoto a kawasa, na pitero iyan ki Natan a "Matamataan ko kaoyagoyag o Allah ka patot a mbonoon so mama a minggolaola sii!

6 Disomala a kebyadan iyan sa pat takep angkoto a bilibili sabap ko da a kapedi iyan a pinggolaola niyan."

7 "Seka so mama!" a tig i Natan ki Daod. "Na giyai i pitero o Allah a Tohan o Israil: 'Biyaloy aken seka a dato sa Israil na siyabet aken seka ko lima i Saolo.

8 Inibegay aken reka so pamiliya niyan ago so manga karoma niyan a masiyap ka; inibegay aken reka pen so ndatoan a Israil ago giya Yodah, na o maito pen ai reka na kebegan ko seka pen sa madakel!

9 Ino ngka pegongkira so manga katero aken sa kiyanggolaolaa ngka sangkai a marata sii ko kapegilaya ko ron? Piyakibono o ka si Oriyas a Hitiyo ko katidawa na kinowa ngka so karoma niyan a mapengaroma ngka! Inibono ka on so pedang o manga Amoriyo.

10 Kagiya ka maoto na di den kebelag ko pamiliya ngka so pedang sabap sa linimbanan ako ngka ago kinowa ngka so karoma i Oriyas.'

11 Pitero pen o Allah a 'Pakiwitan ko seka sa morala a nggolalan ko pamiliya ngka. Sii den ko kapegilaya ngka on na kowaan aken so manga karoma ngka ka imbegay aken ko madaseg ka, na perembangen iyan siran sii ko kaliwanag o kadaondaw.

12 So pinggolaola ngka na sii sa masolen, ogaid na penggolaolaan ko ini ko kaliwanag o kadaondaw sii ko kapekeilaya on o langon a Israil."

13 Na pitero i Daod ki Natan a "Miyadosa ko ko Allah!"

"Rinilaan mambo o Allah so dosa ngka," a inisembag i Natan, "na kena o ba ka petay.

14 Ogaid na sabap sa bigan ka so manga ridoay o Allah sa mipagitowito iran rekaniyan a nggolalan ko pinggolaola ngka na mataan den a petay so bago a mama a inimbawata a ka."

Miyatay so Wata a mama i Daod

15 So den so kiyapakabaling i Natan na piyakasekit o Allah so wata i Daod a inimbawata on o karoma i Oriyas.

16 Inipangangampedian i Daod so wata ko Tohan. Mipowasa sekaniyan na oman gagawii na pesoled ko walay niyan ka pegiga ko lopa sa mababas a gawii.

17 So manga sanasanaan iyan ko torogan na somiyong on ka pakapembowaten iran ko lopa, ogaid na minda si Daod na da iyog o ba kiran atoang ko kapekan iran.

18 Sii ko ikapito gawii na miyatay so wata. Miyalek so manga sanasanaan i Daod o ba iran on teroa a miyatay so wata, ka mapipikir iran a "Isako oyagoyag pen so wata na igira a di tano dii makimbitiyarai ki Daod na di tano niyan pekinegen. Andamanaya i kapeteroa tano ron sa miyatay so wata? Baanda niyan pakasakiti a ginawa niyan!"

19 Miyainengka i Daod a di siran dii mamagetonga na kiyasabotan iyan a miyatay so wata. "Ba miyatay so wata?" a iniise iyan.

"Oway," a tig iran, "miyatay den."

20 Mandiyadi na mimbawat si Daod ko lopa, na kagiya makapeigo ago makakekamotan ago makasambi sa nditaren na somiyoled ko Walay o Allah ka sominimba. Na kagiya maling sekaniyan sa walay na miyangni sa pangengenken na inenatan iran na komiyan den.

21 Na iniise on o manga sanasanaan iyan a "Ino ngka ini dii nggolaola? Sii ko kaooyagoyag o wata na di ka dii powasa ago pesegad. Ogaid na sii den ko kiyapatay niyan na mimbawat ka ago komiyan!"

22 "Oway," a tig i Daod, "isako oyagoyag pen so wata na mipowasa ako ago somigad, ka mapipikir aken a 'Antawaa i matao ron, ka baanda ko ikalimo o Tohan na oyagen iyan so wata.

23 Ogaid na imanto a miyatay sekaniyan den na ino ako pen pepowasa? Ba aken mapekakasoy? Kesono aken sekaniyan ogaid na di raken kesoy."

Inimbawata si Solaiman

24 Oriyan ai na piteyotayoan i Daod si Batsiba a karoma niyan. Somiyong sekaniyan on na romimbang on, na miyaogat si Batsiba ago mimbawata sa mama, na bitowan iran sa ngaran a Solaiman. Pekebabayaan o Allah so wata

25 Na siyogo iyan so Nabi Natan sa kabetowi niyan on sa Yadidiyas, ka pekebabayaan sekaniyan o Allah.

Inagaw i Daod so Siti a Rabah

26 Pamomolowan a dii makitidawa si Yowab ko tindos a siti o manga Amoniyo a giya Rabah na magaan iyan maagaw.

27 Na somiyogo si Yowab sa makapetero ki Daod sa "Giyobat aken a Rabah na miyaagaw aken so pekepoonan ko ig iran.

28 Na pagolowani ngka imanto so ped ko manga sondaro na likopi niyo so siti na go niyo agawa, ka o di, na saken i pekaagaw ron na kisangay so siti sa ngaran aken."

29 Na giyoto a piyagolowanan i Daod so langon o manga sondaro na somiyong siran sa Rabah na giyobat iran ago miyaagaw iran.

30 Kinowa niyan so sangkad a bolawan ko olo o dato iran a aya kapened iyan na manga telo polo ago pat ka kilo a piyagartaan sa manga montiya, na tiyago ini ko olo i Daod. Na tanto a mala a miyateban iyan ko siti.

31 Piyamakaliyo niyan so manga taw a kibabaling on na piyamakanggalebek iyan siran sa kanggagabas, kapangebar, kapamatok ago kapamangembaal sa manga bata. Giyanan i pinggolaola niyan ko langon a inged o manga Amoniyo. Oriyan iyan na komiyasoy si Daod sa Yarosalim a rakes o langon a sondaro niyan.

2 SAMOWIL 13

Si Amnon ago si Tamar

So wata i Daod a si Absalom na aden a mataid a babay niyan a si Tamar. Si Amnon a isa pen ko manga wata i Daod na kiyababayaan iyan si Tamar,

2 Na inikasakit iyan so kipekedaliin iyan ki Tamar ka kagiya raga pen, na maregen ki Amnon o ba aden a manggolaola niyan on.

3 Ogaid na aden a layok i Amnon a aya ngaran iyan na si Yonadab a wata o pagari i Daod a si Simiyas. Si Yonadab na tanto a baraakal a mama

4 Na iniise iyan ki Amnon a "Ino ka a wata o dato na lagid o ba mararata a ginawa ngka oman gawii? Ba ngka raken di mapetero?"

"Pekebabayaan ko si Tamar a babay o pagari aken a Absalom," a inisembag i Amnon.

5 "Iga ka ko igaan ka na go ka sesakisakit," a tig i Yonadab. "Na amay ka ibentel ka i ama ka na teroa ngka on a 'Kapedipedi ka bo na pakasonga ngka raken si Tamar a babay aken kaan ako niyan kanati sa pangenengken. Na pakitiyagaren ka on a kamamasaan aken kaan aken pekeilay ago mapanongit ako niyan."

6 Na miniga si Amnon a misesakisakit. Kagiya ibentel o dato na pitero on i Amnon a "Kapedipedi ka bo na pakasonga ngka raken si Tamar a babay aken kaan ako niyan mimbaal sa maito a manga mamis ko kapekeilaya ko ron ago mipanongit iyan raken."

7 Na piyakisogoan i Daod si Tamar sii sa walay a tig iyan a "Song ka ko walay i Amnon a pagari ngka na tiyagari ngka sa pangenengken."

8 Na somiyong roo si Tamar na miyaoma niyan si Amnon a miiga. Kominowa sekaniyan sa arina na pitiyagar iyan ago pimbaalan iyan a manga mamis ko kapegilaya on i Amnon. Oriyan iyan na pimamis iyan

9 Na kinowa niyan so kara na inenat iyan on so manga mamis, ogaid na minda si Amnon o ba niyan kana. Pitero iyan baden a "Pakaliyowa ngka so langon a sisii," na mililiyo so oman i isa.

10 Oriyan iyan na tig iyan ki Tamar a "Wita ngka raken so pangenengken sii ko rowang aken kaan ka raken mipanongit." Na kinowa i Tamar so manga mamis na inowit iyan ki Amnon sii ko rowang iyan.

11 Ogaid na kagiya isongit iyan on na giyander iyan sekaniyan a tig iyan a "Rembang ka raken, Babay!"

12 "Di ka, laki ko!" a tig i Tamar. "Di ako ngka tegela! Di patot i ba mapenggolaola so datar ai sii sa Israil! Di ngka sowaa angkai a marata!

13 Anda ko tegoa so kayaan aken? Ago seka! Kedatar ka o isa ko manga lalong sii sa Israil. Kapedipedi ka bo na pakimbityarai ka ko dato ka di niyan isepar so kapangaromaa ngka raken."

14 Ogaid na da niyan pakinega so dii teroon i Tamar, na sabap sa mabager si Amnon a di sekaniyan na liyobed iyan.

15 Oriyan iyan na tanto sekaniyan a inikagowad i Amnon, ka so kipekegowaden iyan on na lebi a mala a di so kiyababayai niyan on isako mona. Na pitero on i Amnon a "Mbowat ka na go ka liyo!"

16 "Di," a tig i Tamar. "So kabogawa ngka raken na lebi a mala a kamarataan a di so miyanggolaola ngka raken den!"

Ogaid na da den pakinega i Amnon.

17 Tiyalowan iyan so mangoda a di on dii telagad na tig iyan a "Pakaawaa ngka sii angkai a babay! Pakaliyowa ngka na go ngka tanggali so pintoan!"

18 Na piyakaliyo o mangoda na tiyanggalan iyan so pinto. Somosolot si Tamar sa mbarambarang i warna a kimon a matas i barokan, ka giyai i nditaren o da makeroma a babay a wata o dato.

19 Na tiyagoan iyan sa ombi so olo niyan ago kinisi iyan so kimon iyan, na diyapengan iyan a lima a paras iyan na lomiyalakaw a penggoraok sa matanog.

20 Kagiya mailay i Absalom a laki niyan na pitero iyan on a "Ba ka pitekor i Amnon a pagari ngka? Rerenek ka baden, babay ko, ka laki ngka sekaniyan. Di ngka ndalema ko poso o ka." Na sii den komakaden si Tamar ko walay i Absalom a laki niyan a kekarata a ginawa niyan a babay.

21 Kagiya maneg ai langon i Daod na tanto a kiyararangitan. Ogaid na da niyan danega so wata iyan a Amnon sabap sa pekebabayaan iyan ka popaw sekaniyan sa lawas iyan.

22 Na da den a ba pitero i Absalom ki Amnon apiya anda ko marata o di na mapiya ka ipekegowad iyan si Amnon sabap ko kiyalobeda niyan ki Tamar a babay niyan.

Biyono i Absalom si Amnon

23 Kagiya makadowa den ragon na pepakipangopawan i Absalom so manga bilibili niyan sii sa Baal Hasor a marani ko inged a Ipraim, na biyantowan iyan so langon a wata a mama o dato a somong roo.

24 Na somiyong si Absalom ko dato Daod na pitero iyan on a "Hey kadnan ko, pepakipangopawan aken so manga bilibili aken. Pengnin ko reka, dato, a roo kano raken makadarpa ago so manga sanasanaan ka."

25 "Di, wata ko," a tig o dato. "Langon kami di pekadarpa ka ba kami reka baden pekabangen." Na apiya pen tigel sekaniyan i Absalom na da den iyog o ba roo song, na riyakmatan iyan baden si Absalom.

26 Ogaid na pitero i Absalom a "O di, na kapedipedi ka bo na pakaonota ngka rekami si Amnon a pagari aken."

27 "Antonaa i pagonotan iyan reka?" a iniise i Daod.

27 Ogaid na tigel sekaniyan i Absalom na piyakaonot iyan on si Amnon ago so ped a manga wata o dato a manga mama.

Mitiyagar si Absalom sa bangkiti a patot ko dato.

28 Na ininsaratan iyan so manga talasogoay niyan a tig iyan a "Pakinega ko niyo! Amay ka mabereg sa arak si Amnon na go ko reka teroa a 'Lakota niyo si Amnon,' na nggolaolaa niyo den! Di kano pekelek. Ba kena a saken i somiyogo rekano? Pakababager kano ago pakawawaraw!"

29 Na ininggolalan o manga talasogoay i Absalom so inisogo iyan kiran ka biyono iran si

Amnon. Na giyoto a tominikeras so langon a ped a manga wata o dato na mikokoda siran ko manga kimar iran na miyamalagoy.

30 Sii ko kapekesoy iran sa Yarosalim na miniripot ki Daod a "Piyamono langon i Absalom so manga wata o dato; da den a isa kiran bo a ba miyalamba."

31 Na tominindeg so dato na kinisi iyan so nditaren iyan na gomipe ko lopa; na so pen so langon a talasogoay niyan a tomitindeg roo na piyamangisi iran mambo so manga nditaren iran.

32 Ogaid na si Yonadab a wata o pagari i Daod a si Simiyas na pitero iyan a "Kadnan ko, di ngka pemikira o ba iran piyamono langon so manga wata a ka; si bo si Amnon i miyatay. Giyanan den i kekadiyaten i Absalom ipoon ko gawii a kiyalobeda i Amnon ki Tamar a babay niyan.

33 Kagiya ka maoto, kadnan ko a dato, na di ngka pegawiden a akal so total a palaya den miyamatay so manga wata a ka, ka si bo si Amnon i miyatay."

34 Samaoto na miyalagoy si Absalom.

Na lomiyangkaw so mangoda a bantabantay na miyailay niyan a madakel a taw a petondagay ko silid o bobongan sii ko lalan a ipesong sa Horonaim. Somiyong sekaniyan ko dato na iniripot iyan on so miyailay niyan.

35 Na pitero i Yonadab a "Ilaya ngka man, ka pepekaoma so manga wata a ka, dato; so den so pitero aken a oripen ka i miyanggolaola."

36 So den so kiyapakapasad iyan tero na miyakaoma so manga wata o dato a dii nggogoraok sa matanog. So mambo so dato ago so langon a talasogoay niyan na tanto siran a miyakagoraok.

37-38 Miyalagoy si Absalom na miyagapas ko dato sa Gisor a si Talmay a wata i Ahimod na tomiyareg roo ko miyakatelo ragon. Gawii gawii den na dii imboboko i Daod so wata iyan a Amnon.

39 Ogaid na kagiya mada den so kinimbokoon iyan ko kiyapatay i Amnon na tanto a kipekedaliin iyan ki Absalom.

2 SAMOWIL 14

Komiyasoy si Absalom sa Yarosalim

Kagiya masipat i Yowab a ipekedali o dato si Absalom

2 Na piyakisongowan iyan so sakataw a baraakal a babay a mababaling sa Tikowa. Na pitero iyan on "Omamanti ka sa di ka dii ndiyaga. Solot ka sa nditaren o dii ndiyaga na di ka den petetanosan. Sayan ka sa babay a miyatay den a kimbobokoon iyan ko miyatay,

3 Na song ka ko dato na go ngka on teroa ngkai a totolan." Na giyoto a pitero on i Yowab so totolan a mapetero o babay.

4 Kagiya makaoma so babay ko dato na somiyodiyod sekaniyan on a piyagadatan iyan, na tig iyan a "Tabangi ako ngka, hey dato!"

5 "Antonaa i awid a akal ka?" a iniise iyan on.

"Mataan den a balo ako a babay," a inisembag iyan. "Miyatay so karoma ko.

6 Saken a oripen ka na aden a dow a wata aken a manga mama. Miyakaisa a gawii na mimbono siran a dow a sii ko pangomaan na da den a ba kiran miyakambelag. So isa on na miyasogat iyan so ped na miyapatay niyan.

7 Imanto na so langon a tonganay aken na pekerarangitan ako iran a tig iran a 'Palada ngka rekami so wata a ka a miyakapatay ko pagari niyan kaan ami mabono a imbadal ko niyawa o pagari niyan a biyono iyan.' O penggolaolaa iran ai na da den a ba raken kelamba a wata a makapekewali. Perengen iran so sasatiman bo a waga aken, na da den a pelambaan iran ko karoma ko a ngaran o di na moriyataw sii ko doniya."

8 Na pitero o dato ko babay a "Baling ka, ka katao ko den angkai a masosowa."

9 Tig o babay a "Apiya antonaa i penggolaolaan ka, kadnan ko a dato, na pengnin ko a sii raken misendit ago so pamilya o ama aken na da a sala a ka on aya pen so ndatoan ka."

10 Somimbag so dato a tig iyan a "O aden a manarotaro reka na wita ngka raken, ka di ka niyan den pesemoken."

11 Tig o babay a "Kapedipedi ka bo, dato, na pangniya ngka ko Allah a Tohan ka a so tonganay aken a seop ko miyabono na di on maparo o ba niyan kaomani so kapekebinasa kaan di petay so lamba a wata aken."

"Matamataan ko kaooyagoyag o Allah," a tig o dato, "ka da den a satiman bo a bok ko olo o wata a ka a ba maroro ko lopa."

12 "Na pengnin ko reka, kadnan ko a dato, a aden pen a pakipetero o ka raken," a tig o babay.

"Teroa ngka," a inisembag iyan.

13 Na pitero o babay a "Sii ko kiyateroa ngka sii langon na ba ngka da salaa a ginawa ngka sabap ko da ngka kapakakasoya ko minitaog a wata a ka? Ino ngka penggolaolai sangkai a ribat so manga pagtaw o Tohan?"

14 Aya mataan na pematay tano langon, ka lagid tano o ig a pegododen ko lopa a di den kekowa peroman. Apiya so Tohan na di niyan ikesoy so niyawa, ogaid na di sekaniyan dii tekdir sa okit kaan so taw a minitaog iyan na di on kebelag.

15 "Na aya inisong aken reka imanto, kadnan ko a dato, sa kapeteroa ko sii na sabap sa piyangangalek ako o manga taw; na pitero aken sa ginawa ko a 'Makimbitiyarai ako ko dato ka baanda niyan penggolaolaa so pepamangnin on o oripen iyan.

16 Ka pekinegen ako o dato na pokasen kami niyan ago so wata aken ko kapaar o mama a pepanamar rekami tomped sangkai a inged a kawali o Tohan.'

17 Tig aken pen sa ginawa ko a 'Ipekalintad aken so katero o kadnan ko a dato, ka so dato na datar o malaikat o Tohan a sasaboten iyan so mapiya ago so marata.' Malalayon reka so Allah a Tohan ka!"

18 Somimbag so dato a tig iyan ko babay a "Aden a ipagise aken reka, na di ngka raken pegmaa so tito a sembag."

"Isei ako ngka sa apiya antonaa, kadnan ko a dato," a tig o babay.

19 "Ba kena a si Yowab i somiyogo reka sangkai langon?" a iniise iyan.

Tig o babay a "Matamataan ko kaooyagoyag ka, kadnan ko a dato, ka di aken kelidasan so kapeteroa ko reka ko tito a benar. Oway, si Yowab a oripen ka i somiyogo raken ago miyangendao raken tero sangkai langon.

20 Ogaid na pinggolaola niyan ai kaan maalin so mambebetad a kapapantagan. Aden a ongangen ka, kadnan, a datar o ongangen o malaikat o Tohan sa katokawi ngka ko langon a dii manggolaola ko inged."

21 Oriyan ai na piyakisongowan o dato si Yowab na pitero iyan on a "Penggolaolaan ko imanto angkai a kabaya a ka. Ika roo den na kasowin ka sii so mangoda a si Absalom."

22 Gomipe si Yowab ko lopa a piyagadatan iyan so dato, na piyanalamatan iyan a tig iyan a "Imanto, kadnan ko a dato, na kiyatokawan aken a inikalimo ako ngka a oripen ka kagiya inampon ka so piyangni aken."

23 Na gomiyanat si Yowab ka somiyong sa Gisor na inibaling iyan si Absalom sa Yarosalim.

24 Ogaid na pitero o dato a "Disomala a sii sekaniyan tomaros ko walay niyan a di raken pakipegilaya." Sabap roo na miyamantek si Absalom ko walay niyan a da niyan mailay so dato.

Rinilaan i Daod si Absalom

25 Sii ko langon o manga Israil na da den a ba datar sa kataid i Absalom. Ipoon ko poro o olo niyan na taman sa palad a ai niyan na da den a ba niyan daway.

26 Makaisa ko oman ragon a kapepotoli niyan ko bok ko olo niyan igira a miyakapened rekaniyan. Na igira a pepotolan iyan na petimbangan iyan, na aya kapened iyan na dow a ka kilo ago tenga a pepakaokiten ko timbangan a ontol ko ndatoan.

27 Telo kataw a wata a mama a inimbawata i Absalom ago sakataw a babay a aya ngaran iyan na Tamar, na tanto sekaniyan a mataid a babay.

28 Miyakadowa ragon a kiyabaling i Absalom sa Yarosalim a da niyan den mailay so dato.

29 Kagiya ka maoto na piyakisongowan iyan si Yowab kaan iyan mapakasong ko dato, ogaid na da on song si Yowab. Sakamaoto a piyakisongowan iyan sa ikadowa ogaid na minda si Yowab o ba on song.

30 Sabap roo na pitero i Absalom ko manga talasogoay niyan a "Katawan iyo so dii mbasokan i Yowab a mindadair o rek aken a pegto on so bantad. Ikano roo na go niyo bisoli." Na somiyong siran ko lopa iyan na binisolan iran.

31 Na giyoto a somiyong si Yowab ko walay i Absalom a tig iyan on a "Ino totonga o manga talasogoay ngka so bantad aken?"

32 Tig i Absalom a "Sabap sa da ka sii song isako pakisongowan aken seka. Kabaya aken a sogoon ko seka ko dato ka pakipetero aken reka on a 'Ino ako sii pekasong a poon sa Gisor? Tomo a ba ako roo baden pen makakakaden!'" Tig pen i Absalom a "Imanto den na kebaya ako makipegilaya ko dato, na o aden a miyasela aken na kebono ako niyan den!"

33 Mandiyadi na somiyong si Yowab ko dato na piyanotol iyan on so pitero i Absalom. Na piyakisongowan o dato si Absalom a somiyong on ago somiyodiyod ko hadapan iyan. Na inarekan o dato si Absalom.

2 SAMOWIL 15

So Kiyasopak i Absalom

Da peman matey na kominowa si Absalom sa karo sa katidawa a rakes o manga koda ago lima polo a manga mama a makapangongonaan rekaniyan pepalalagoy.

2 Aya olaola niyan na dii mbowat komabalaga ago petindeg ko kilid o lalan a ipesoled ko gimowa o siti. Na igira aden a pepekaoma ko dato a pekikokom on ko masosowa iyan na petelowan i Absalom a tig iyan a "Anda ka poon a inged?" Na igira a pitero o mama o antonaa i mbatabataa ko Israil a kaapedan on

3 Na dii teroon i Absalom a "Ilaya ngka man, ka ontol ago wadib so kabonar ka, ogaid na da a makasasaliyo ko dato a pekaneg reka."

4 Na ipegoman on pen i Absalom a tig iyan a "O ba ako bo minitoro a pangongokom sangkai a inged! Samaoto na oman i aden a ipepanon o di na simoket iyan na pekasong raken na penamaran aken a miyontol sekaniyan sa kokoman."

5 Na igira aden a pepekarani ki Absalom a pesodiyod on na pekewaan i Absalom na go pegarekan iyan.

6 Giyanan i dii nggolaolaan i Absalom ko langon o manga Israil a pesong ko dato a pepakikokom on, na piyakasoramig iyan ko ginawa niyan so poso o manga taw sa Israil.

7 Kagiya makapat den ragon na pitero i Absalom ko dato Daod a "Pakalalakawa ko ngka sa Hibron kaan ako ron makatoman sa samaya aken ko Allah.

8 Ka isako komakaden ako pen sa Gisor sii sa Siriya na inisemaya aken a tig aken a 'O pakakasoya ko o Allah sa Yarosalim na simbaan aken sekaniyan sii sa Hibron.' "

9 "Ika roo den sa da a rayorayo a ginawa," a tig o dato.

Na gomiyanat si Absalom na somiyong sa Hibron.

10 Ogaid na kagiya makaoma roo na miyanonogo sekaniyan sa makaneb sa masolen sii ko langon a mbatabataa a Israil ka pakipetero iyan kiran a "So den so kanega niyo ko oni o bogiyong na lalisen iyo a 'Miyabaloy si Absalom a dato sii sa Hibron!' "

11 Aden a dow a gatos a mama a miyamangonot den ki Absalom a poon sa Yarosalim. Matag siran miyapamoyo a manga banto, na miyonot siran on a da a peleng iran on, ka da den a katawi ran mipantag sii.

12 Na sii ko kapekorban i Absalom na piyakisongowan iyan pen si Ahitopil a mababaling sa Giloh a isa ko mosawira i Daod. Na pepangosor so kapesopaka ko dato na pepekadakel so petempil ki Absalom.

Miyalagoy si Daod a poon sa Yarosalim

13 Na aden a miyakaoma a miyanotol ki Daod a tig iyan a "Misoramig ki Absalom so poso o manga taw sa Israil!"

14 Na pitero i Daod ko langon a sanasanaan iyan a maaped iyan sa Yarosalim a "Itano roo! Malagoy tano den imanto, ka o di, na da den a isa rektano bo a ba pekalidas ki Absalom! Nggagaan kano ka o ba tano niyan baden maoma nggagaan a siksaan tano niyan ago pemoon iyan a pedang so manga taw ko siti!"

15 "Oway, kadnan ami a dato," a inisembag iran. "Makatitiyagar kami nggolaola sa apiya antonaa i kabaya a ka."

16 Na gomiyanat so dato a rakes o langon o pamilya niyan, ogaid na inibegak iyan so sapolo a manga sandil iyan a makakibir ko torogan.

17 Sii ko kapengganat o dato a ped iyan so langon o manga pagtaw niyan na tomiyareg siran ko temanaan o siti.

18 So manga sanasanaan iyan na tomitindeg ko obay niyan sii ko kapepakaonaa niyan ko manga sondaro niyan a di on dii nggogordiya. Ndodoo mambo so nem gatos a sondaro a miyonot rekaniyan a poon sa Gat, na sii ko kapesegadi iran ko dato

19 Na pitero iyan ki Itay a olowan iran a "Ino kano rekami pekaonot? Kasoy kano na go kano telimbagak a ped o dato Absalom. Mananangga ka a piyalagoyan ka so inged ka.

20 Babago a kiyapakaoma ngka sii, na ino aken seka mapakapegenebeneb imanto a ped ami a di aken pen katawan o anda kami song? Kasoy ka na pakaonota ngka so ped ka a manga taw. Na malalayon rekano so limo o Allah ago so kasasarigi rekaniyan!"

21 Ogaid na simbag i Itay so dato a tig iyan a "Matamataan ko kaoyagoyag o Allah ago so kaoyagoyag ka, kadnan ko a dato, ka apiya anda ka ketago na ndodon ako mambo a oripen ka apiya pen o sii kiyarong ko kapatay."

22 "Mapiya nan!" a inisembag on i Daod. "Taros kano lomalakaw!" Na tomiyaros lomalakaw si Itay a rakes o langon a sondaro niyan ago so manga pamilya iran a moonot kiran.

23 Penggoraok sa matanog so langon a taw ko pagingedingedan sii ko kapesegadi kiran o dato ago so langon a ped iyan a sii ko kapeterapasa iran ko Balintad a Kidron ago sii ko kapegiseg iran sa tampar sa disirto.

24 Ndodoo mambo so manga imam a si Abiyatar ago si Sadok a ped iran so langon a manga Libitiyo a maawid ko Kaban sa Kapasadan o Tohan. Na inibetad iran so Kaban o Tohan taman sa di makaipos mawa so langon a taw ko siti.

25 Ogaid na pitero o dato ki Sadok a "Kasowin ka so Kaban o Tohan ko siti. O ikelimo ako o Allah na pekakasowin ako niyan kaan aken mailay peroman so Kaban ago so kakadenan iyan.

26 Ogaid na o teroa niyan raken a 'Di ako reka kesoat' na makatitiyagar ako sa ikidia niyan raken ko kabaya iyan."

27 Tig pen o dato ki Sadok a "Giyai so antangan aken: kasoy kano ago si Abiyatar ko siti sa kalilintad na pakaonota niyo so wata a ka a si Ahimaas ago si Yonatan a wata i Abiyatar.

28 So saken on na menayaw ako ko keripagan ko lawasaig a Yordan sii ko disirto taman sa misampay raken so pekitokawan iyo raken a katero."

29 Na giyoto a inikasoy i Sadok ago si Abiyatar so Kaban o Tohan sa Yarosalim na mitelimbagak siran roo.

30 Ogaid na tomiyaros tomakedeg si Daod ko lalan a ipesong ko Palaw a Olibi a penggoraok ko kapelalakaw niyan. Kasasapengan so olo niyan ago da a tinilas iyan a toos ko kamboboko iyan. So mambo so manga taw a ped iyan na palaya den kasasapengan a manga olo iran a di siran dii nggogoraok ko kapetekedeg iran.

31 Miyatero den ki Daod a "Minitampil si Ahitopil ko miyamanopak a ped i Absalom." Na miyangangarapan si Daod a tig iyan a "Ya Allah, kapedipedi ka bo na baloya ngka a da a rantek iyan so ipemosawir i Ahitopil!"

Miyabaloy si Hosay a Panonoriman i Daod

32 Kagiya makaoma si Daod ko poro o palaw a ron pesimbaa o manga taw so Tohan na inalaw sekaniyan i Hosay a taw sa Arki a makikisi so nditaren iyan ago katatagoan sa bayanek so olo niyan.

33 Pitero on i Daod a "O onot ka raken na ba ka raken baden pekabangen.

34 Ogaid na keogopan ako ngka o kasoy ka ko siti na go ngka teroa ki Absalom a 'Oripem ako gowani o ama a ka, ogaid na pembaloy ako imanto a oripem ka.' Amay ka magiyoto na kebinasa ngka so mosawir i Ahitopil.

35 Ndodoo a ped ka so manga imam a si Sadok ago si Abiyatar. Pakitokawi ngka kiran so apiya antonaa i keneg ka sii ko torogan o dato.

36 Ndodoo mambo a ped iran si Ahimaas a wata i Sadok ago si Yonatan a wata i Abiyatar. Sogoa ngka siran raken kaan iran raken matero so apiya antonaa i ketokawan ka."

37 Mandiyadi na si Hosay a ginawai i Daod na komiyasoy sa Yarosalim a so kiyapakaoma niyan roo na aya den kapesoled i Absalom ko siti.

2 SAMOWIL 16

Si Daod ago so Talasogoay i Mepibosit

Kagiya makalepas si Daod sa malo mawatan ko poro o palaw na ndodoo si Siba a so talasogoay i Mepibosit a nomanayaw rekaniyan. Totondaan iyan so dow a kimar a rororanan sa dow gatos timan a paan, magatos tompi a pasas, magatos ka giponga a onga a pamomolan ago isa ka tagoay a arak.

2 Iniise o dato ki Siba a "Ino ngka ini sii pagowita?"

Tig i Siba a "So manga kimar na kapekodaan o pamiliya ngka, dato, na so paan ago so manga onga a pamomolan na pekekan o manga mama, na so arak na keinom o siran oto a tanto a inikopay sii ko disirto."

3 Na inisean pen o dato a tig iyan a "Anda si Mepibosit a apo i Saolo a kadnan ka?"

"Petelimbagak sa Yarosalim," a inisembag i Siba, "ka kagiya aya mapipikir iyan na ikesoy rekaniyan imanto o manga Israil so ndatoan o ama iyan a dato a si Saolo."

4 Na pitero o dato ki Siba a "Ilaya ngka man, ka so langon taman a rek i Mepibosit na rek ka imanto."

"Pepangalimbabaan ako a pesodiyod reka," a tig i Siba. "Masoat ka raken lalayon, kadnan ko a dato!"

Inisinta i Simay si Daod

5 Sii ko kapepekarani i Daod sa inged a Bahorim na linyowan o sakataw a mama a tonganay i Saolo a aya ngaran iyan na si Simay a wata i Gira, na dii mamaninta sii ko kapeliyo niyan.

6 Perobaken iyan a ator si Daod ago so langon a sanasanaan iyan apiya pen mbabalaan sekaniyan sa kawanang diwang o manga mama niyan ago manga gordiya.

7 Sii ko kapepamaninta i Simay na di niyan dii pelalis a "Awa ka sii! Awa ka sii a talibono ago marata a mama!"

8 Peseopan ka o Allah sabap ko langon a piyamoto o ka sii ko pamiliya i Saolo a kiyagawan ka sa kadato. Piyalad o Allah so ndatoan ki Absalom a wata a ka na kiyasiksaan ka den, ka talibono ka a mama!"

9 Na pitero i Abisay a wata i Siroyah ko dato a "Ino makapepamaninta reka angkoto a maatay a aso, kadnan ko a dato? Pakisongowi ngka raken ka potolan ko sa olo!"

10 "Kena a ba niyo ini galebek!" a tig o dato ki Abisay ago si Yowab a pagari niyan. O aya niyan dii kasinta na sabap sa pitero on o Allah a 'Sintaan ka si Daod,' na antawaa i pekaise o ino niyan anan dii nggolaolaa?"

11 Mandiyadi na pitero pen i Daod ki Abisay ago sii ko langon a sanasanaan iyan a "Ilaya niyo man, ka so tito a wata aken a rogo aken bo i mananamar raken mono. Aya pen angka a taw sa Baniyamin! Di niyo petekora; pakasintaa niyo baden ka inisogo on o Allah.

12 Baanda keilay o Allah so kaperasaya raken na balasan ako niyan sa mapiya sabap ko kipepanintaan iyan raken sangkai a gawii."

13 Na tomiyaros lomalakaw si Daod ago so manga mama niyan sii ko lalan a misesakeb iyan on pelalakaw si Simay sii ko silid o bobongan a pepamaninta ago pepalantigen iyan a ator ago petepoyakan iyan pen sa bote.

14 Na diyokawan so dato ago so langon a ped iyan kagiya makaoma ko songowan iran, na miyakadeke siran roo.

So Mosawir i Ahitopil

15 Si peman si Absalom na miyakaoma sa Yarosalim a rakes o langon a manga mama

niyan a ped iyan mambo si Ahitopil.

16 Na si Hosay a ginawai i Daod na somiyong ki Absalom a dii melalis sa "Mamboway so dato! Mamboway so dato!"

17 Iniise on i Absalom a "Ba giyai i kipekelimoon ka ki Daod a ginawai ngka? Ino ka on da onot?"

18 "Di kepakay," a tig i Hosay, "ka aya ko pagampilan na so miyatomo o Allah ago giyangkai a manga taw ago so langon a mama sa Israil; keden ako sii reka den.

19 Liyo ron pen na antawaa i patot a penalagadan ko? Ba di so wata o kadnan aken? Datar o kiyapanalagadi aken ki ama a ka na aya ko reka mambo kapenalagadi."

20 Na siyangoran i Absalom si Ahitopil na iniise iyan on a "Begi ako ngka sa mosawir; antonaa i telondog a penggolaolaan tano?"

21 Tig i Ahitopil a "Rembanga ngka so manga sandil i ama a ka a inibegak iyan a kibir ko torogan. Giyoto a ketokawan o langon a Israil a biyaloy ngka a ginawa ngka a piyakasingay ki ama a ka, na ipekabager ai o kapegabanga reka o langon a ped ka."

22 Sabap roo na inimbarombarong iran si Absalom sii ko pantar a atep o torogan; na somiyoled sekaniyan on sii ko kapekeilaya on o langon a Israil na pিরerembang iyan so manga sandil i ama iyan.

23 Sangkoto a manga gawii na apiya antonaa a ipemosawir i Ahitopil na tatarimaan a lagid o miyapayag o Tohan, ka ndatar si Daod ago si Absalom a petomanen iran so mosawir iyan.

2 SAMOWIL 17

Aya pen a pitero i Ahitopil ki Absalom na "Pakapilia ko ngka sa sapolo ago dowanggibo a mama a ngganat imanto a gagawii sa kapeselobaa mi ki Daod.

2 Sondolan ko sekaniyan ko kadodokawi ron pen a da a bager iyan. Pekatanaan ko sekaniyan sa kalek, na pemalagoy so langon a taw a ped iyan, na so bo so dato i mbonoon ko.

3 Na ikesoy aken reka so langon a mama niyan, na amay ka komasoy siran a rowar ko sakataw a di ngka dii mbanogen na makalintad so langon o manga taw."

4 Giyangkai a takdir na datar o ba mapiya ki Absalom ago so langon a pelokelokesen sa Israil.

So Mosawir i Hosay

5 Ogaid na pitero i Absalom a "Talowi niyo mambo si Hosay ka pamakinegen tano o antonaa i mapetero iyan."

6 Kagiya makaoma si Hosay na pitero on i Absalom a "Giyai so mosawir a inibegay rekami i Ahitopil. Ba ami tomana so pitero iyan? O di, na teroa ngka rekami i lalag ka."

7 Tig i Hosay a "So inimosawir i Ahitopil na kena a ba mapiya sangkai a masa.

8 Katawan ka si Daod a ama a ka ago so manga mama niyan; manga wawaraw siran ago pekerarangkitan a lagid o arimaw a inagawan sa manga wata. Liyo ron pen na mababatak sa katidawa si ama a ka, na di den keden ko manga sondaro niyan ko mababasa gawii.

9 Apiya imanto na masiken a tetapok sekaniyan ko liyang o di na sii ko ped a darpa. Na so den so kanggobata i Daod ko manga sondaro ngka a so ped kiran na miyanga bobono na so apiya antawaa i pekaneg on na ipelalis iyan a 'Pepamonoon so manga sondaro i Absalom!'

10 Na giyoto a apiya so lebi a mawaraw a sondaro a so poso iyan na datar o poso a arimaw na keteno sa kalek, ka katawan o langon o manga Israil a si ama a ka na mapasang i kapakitidawa, na so manga ped iyan na palaya mawaraw.

11 Kagiya ka maoto na aya kimosawir aken reka na timoa ngka so langon a manga Israil ipoon ko isa a temanaan o inged taman ko isa a temanaan a datar sa kadakel o peted sa kilid a ragat; na seka den i pagolowan kiran ko katidawa.

12 Na keoma tano si Daod apiya anda matatago na sondolan tano sa di niyan pen katawan i dii manggolaola. Na da den a pelambaan tano kiran a oyagoyag ndatar sekaniyan ago so manga mama niyan.

13 Na o magapas sekaniyan ko siti na so langon o manga Israil na magawid sa manga tali sangkoto a siti na toyoken tano ini ko baogan taman sa matarotop a kagebaa on."

14 Na pitero i Absalom ago so langon a mama sa Israil a "Tomo so mosawir i Hosay a di so rek i Ahitopil," ka pikodarat o Allah a kebinasa so mapiya a mosawir i Ahitopil kaan iyan kawiti sa morala si Absalom.

Piyakaiktiyar i Hosay si Daod

15 Mandiyadi na iniripot i Hosay ko manga imam a si Sadok ago si Abiyatar so inimosawir iyan ki Absalom ago so manga pelokelokesen sa Israil, ago so pen so inimosawir kiran i Ahitopil.

16 Na tig pen i Hosay a "Sogo kano nggagaan na teroa niyo ki Daod a 'Di ka tereg sangkai a gagawii ko keripagan ko lawasaig a Yordan sii ko disirto; ripag ka on nggagaan, ka o ba kano baden mamamatay ago so langon a taw a maaped ka.'"

17 Si peman si Yonatan ago si Ahimaas a so manga wata o manga imam na sii komakaden sa In Rogil ko liyo a Yarosalim ka di iran kebaraw o ba siran mailay sii ko soled o siti. Sabap roo na aden a somiyong kiran a raga a piyakitokawan iyan kiran so pitero i Hosay kaan iran kasongowi so dato Daod sa kapeteroa iran on sii.

18 Ogaid na miyailay siran o bago a mama na iniripot iyan ai ki Absalom. Sabap sii na minggagaan siran roo mawa a dow a somiyong ko walay o mama sii sa Bahorim. Aden a paridi iyan ko lamalama niyan na miyalosod siran on.

19 Na so karoma o mama na kominowa sa dempas na kiyayat iyan ko ngari o paridi, na kiyayaran iyan ai sa manga pereperan. Na da den a ba sii matao.

20 Miyakaoma ko walay so manga talasogoay i Absalom na inisean iran so babay a tig iran a "Anda si Ahimaas ago si Yonatan?"

"Rominipag siran ko baogan," a inisembag o babay. Mimbabanog so manga talasogoay ogaid na da iran matoon, na komiyasoy siran sa Yarosalim.

21 Kagiya maipos siran na komiyalakat si Ahimaas ago si Yonatan ko paridi na tomiyaros siran sa kapekatokawa iran ko dato Daod. Na pitero iran on a "Nggagaan ka! Ripag ka ko lawasaig imanto a gagawii!" Na piyanotol iran on so inimosawir i Ahitopil a ikebinasa niyan.

22 Na miyaninimo si Daod ago so langon a ped iyan na rominipag siran sa Yordan, na sii ko kakepita iyan na da den a isa kiran bo a ba on da makaripag.

23 Si peman si Ahitopil na kagiya mailay niyan a da matoman so mosawir iyan na siniyaan iyan so kimar iyan na miyaling ko inged iyan. Tiyanor iyan so langon taman iyan na binitin iyan a ginawa niyan; miyatay sekaniyan na inilebeng sii ko kiyoboran ki ama iyan.

24 Miyakaoma si Daod sa Mahanaim sii ko kiyapakaripag i Abasalom sa lawasaig a Yordan a rakes o langon o manga Israil a pagoolowanan iyan. (**25** Minitoro den i Absalom si Amasa a komandir o manga sondaro a minisambi ki Yowab. Si Amasa na wata i Itra a taw sa Ismail a si ina iyan na si Abigail a wata i Nahas ago pagari i Siroyah a ina i Yowab.)

26 Na mikempo si Absalom ago so manga Israil sii sa kalopaan a Giliyad.

27 Kagiya makaoma si Daod sa Mahanaim na inalaw sekaniyan i Sobi a wata i Nahas a poon sa Rabah a siti o manga Amoniyo, ago si Makir a wata i Amiyal a poon sa Lo Debar ago si Barsilay a poon sa Rogelim sii sa Giliyad.

28-29 Inowitan iran sekaniyan sa manga dempas, manga ladiya, manga koden ago so manga pangenengken a makan i Daod ago so manga taw a ped iyan a maana so margas, bantad, arina, sindeg a pereperan, manga kodalis, manga bitowilas, gola a teneb, lana, mimbatik a gatas ago manga bilibili, ka tig iran a "Miyanga aaor ago miyawaw ago diyokawan so manga taw ko kiyapakatarapas iran ko disirto."

2 SAMOWIL 18

Tiyaban ago Miyabono si Absalom

Tinimo i Daod so manga mama a ped iyan na tiyoroan iyan siran sa manga olowan o oman i sanggibo ago olowan o oman i magatos.

2 Na piyakalalakaw niyan siran a so ikatelo bagi na pagoolowanan i Yowab, so ikatelo bagi na pagoolowanan i Abisay a pagari i Yowab, ago so ikatelo bagi na pagoolowanan i Itay a taw sa Gat. Na pitero o dato sangkai a manga sondaro a "Saken den i magonot rekano."

3 "Di ka pagonot," a inisembag iran. "O di ami kegaga ka kepalagoyan ami so manga ridoay na kena a ba sekami i tegoon iran sa ginawa. Apiya pen o mamatay so sabagi rekami na da a bali niyan kiran, ogaid na aya bali ngka na sapolo nggibo rekami. Aya tomo reka imanto na tareg ka den ko siti a ron kami ngka pagowiti sa tabang."

4 Tig o dato a "So mapipikir iyo a mapiya i penggolaolaan ko." Na giyoto a tomitindeg so dato ko kilid o gimowa o siti sii ko kapeliliyo o manga mama niyan a sesagorompong sa mbabagatos ago sesanggibo.

5 Tiyapaosan o dato si Yowab ago si Abisay ago si Itay a tig iyan a "Piyapiyai niyo raken so mangoda a si Absalom." Na miyaneg o langon a sondaro si Daod kagiya mapamando iyan so manga olowan mipantag ki Absalom.

6 Na giyanatan o manga sondaro so siti na miyakitidawa siran ko manga Israil sii ko

kalasan sa Ipraim.

7 Na roo miyataban o manga mama i Daod so manga Israil, na tanto a madakel a miyamatay sangkoto a gawii, a dow a polo nggibo a manga mama.

8 Miyakalaolad so katidawa ko dalem angkoto a darpa, na lebi a madakel a taw a miyalamed o kalasan sangkoto a gawii a di so miyapatay a pedang.

9 Sii ko dii katidawa na so ped ko manga mama i Daod na miyaoma iran si Absalom a kokoda ko kimar iyan. Na sii ko kapesolek iyan ko atag o mala a kayo a marabong i sapak na minisadang so olo niyan ko manga sapak na miyaren roo, na pepalalagoy den so kimar a minibegak si Absalom a mabibitin ko kayo.

10 Kagiya mailay ai o isa a mama na iniripot iyan ki Yowab a tig iyan a "Miyailay aken den imanto si Absalom a mabibitin ko kayo!"

11 Pitero on i Yowab a "Miyailay ngka bes? Ino ngka da bonoa roo? O biyono o ka na mbegan ko seka sa sapolo a pelata a pirak ago sambitan a sondaro."

12 Ogaid na tig o mama a "Apiya pen o mbegan ako sa sanggibo a pelata na di aken den pekatanaan sa lima so wata o dato, ka miyaneg ami so dato ko kiyatapaosi niyan rekano ago si Abisay ago si Itay a tig iyan a "Sabap raken na iktiyari niyo o ba niyo pakasakiti so mangoda a si Absalom.

13 Na o miyatipo aken den so dato ko kiyabonoo ko ki Absalom, ka da den a ba mapegma ko dato, na di ako ngka ipenindeg."

14 Tig i Yowab a "Di ako den pekalakay sii reka." Na miyawid sekaniyan sa telo timan a gasa na inisoker iyan ko rareb i Absalom a pengginawa pen sii ko kayo.

15 Na sapolo kataw ko manga sondaro i Yowab na linibet iran si Absalom na liyakot iran a biyono iran.

16 Oriyan iyan na miyamogiyong si Yowab ka piyakagenek iyan so dii katidawa, na tomiyareg somaloba so manga sondaro niyan ko manga Israil.

17 Kinowa iran so badan i Absalom na inolog iran ko mala a galebo sii ko kalasan, na diyakontoran iran sa madakel a manga ator. Na miyamagapas so langon o manga Israil ko manga walay iran.

18 Sii ko kapepaginetaw i Absalom na inimbaal iyan a ginawa niyan sa monominto sii ko Balintad o manga Dato, ka mapipikir iyan a "Da a wata aken a mama a ba pekataros ko kapananademi ko ngaran aken." Inisangay niyan ai sa ginawa niyan, na pembetowan ai sa Monominto i Absalom taman imanto a gawii.

Miyaneg i Daod so Kiyapatay i Absalom

19 Pitero i Ahimaas a wata i Sadok ki Yowab a "Pakapalalagoya ko ngka ka pagowiten ko ko dato so mapiya a total a piyokas sekaniyan o Allah ko kapaar o manga ridoay niyan."

20 "Kena a ba seka i magowit sa total sangkai a gawii," a tig i Yowab. "Sii den ko ped a gawii i kapagowit ka sa total; kena a ba imanto ka miyatay so wata o dato."

21 Na giyoto a pitero i Yowab ko talasogoay niyan a taw sa Kos a "Ika roo na go ngka panotola ko dato so miyailay ngka." Somiyodiyod sekaniyan ki Yowab na taros a miyalalagoy.

22 Na pitero peroman i Ahimaas ki Yowab a "Da a labet aken ko mapenggolaola; kapedipedi ka bo na pakitondegen ka raken malalagoy so talasogoay."

"Ino ka kebaya roo somong, wata ko?" a iniise i Yowab. "Da a ba ngka roo mapenotol a kebegan ka on sa tendan."

23 "Apiya antonaa i mapenggolaola," a tig iyan, "na kebaya ako roo malalagoy."

"Palalagoy ka den," a tig i Yowab. Na sii miyalalagoy si Ahimaas ko Kapantaran sa Yordan, na da matey na miyalepas iyan so talasogoay.

24 Samaoto na moontod si Daod ko pageletan o dow a gimowa o siti. Na miyanik so bantabantay ko atep o gimowa sii ko poro o keleb o siti. Kagiya lomangkaw na miyailay niyan so isa a mama a pepalalagoy a sekaniyan bo.

25 Na tiyalowan iyan so dato na iniripot iyan on, na tig o dato a "O da a ped iyan na maawid sekaniyan sa total." Na pepekarani den so mama.

26 Oriyan iyan na miyakailay so bantabantay sa salakaw a mama a pepalalagoy, na tomiyalo sekaniyan sa baba ko gordiya ko gimowa a tig iyan a "Ilaya ngka man, ka aden pen a salakaw a mama a pepalalagoy a sekaniyan bo!"

Na tig o dato a "Maawid pen anan sa total."

27 Pitero o bantabantay a "Arangan ko ron na pepalalagoy so maona a datar i Ahimaas a wata i Sadok."

"Mapiya nan a mama," a tig o dato. "Aya kioma niyan na mapiya a total."

28 Na initalo i Ahimaas ko dato a "Mapiiya langon!" Na miyanaros romoko si Ahimaas ko lopa ko hadapan o dato a tig iyan a "Podin so Allah a Tohan ka a migay reka sa kiyapakataban ko manga taw a somiyopak reka, kadnan ko a dato!"

29 "Ba da kakaidi so mangoda a si Absalom?" a iniise o dato.

Tig i Ahimaas a "Kagiya sogoon ako i Yowab na miyakailay ako sa manga taw a magogorigaw, ogaid na di aken katawan i miyaolaola."

30 "Roo ka pasin," a tig o dato. Na lomiyakad si Ahimaas sa kilid na tominindeg roo.

31 Na giyoto a miyakaoma so talasogoay na pitero iyan a "Hey kadnan ko a dato, pakinega ngka so mapiya a total! Inisaop ka o Allah sangkai a gawii ko langon a somiyopak reka!"

32 "Ba da a marata a miyaolaola o mangoda a si Absalom?" a iniise on o dato.

Tig o talasogoay a "Pengnin ko a so manga ridoay ngka ago so langon a somiyopak reka na madatar angkoto a mangoda!"

Inimboko i Daod si Absalom

33 Na minipaar so dato o kamboko na miyanik ko rowang iyan ko poro o gimowa na gomiyoraok. Sii ko kapesong iyan roo na tig iyan a "Hey wata ko a Absalom! Wata ko, wata ko a Absalom! O ba bo saken i miyatay a di seka, wata kolay a Absalom! Wata kolay!"

2 SAMOWIL 19

Na miyatero ki Yowab a "Penggoraok so dato a di niyan dii imboko si Absalom."

2 Mandiyadi na so kapekebabaya o langon a sondaro i Daod ko kiyapakataban iran na kiyasambian sa rata a ginawa sangkoto a gawii sabap sa miyaneg iran so dii matero a "Dii imboko o dato so wata iyan."

3 Na minanay siran somoled ko siti sangkoto a gawii a datar o dii meliso a pekeya ka pepalagoy ko katidawa.

4 Sasapengan o dato a paras iyan na peteros gomoraok sa matanog a tig iyan a "Hey wata kolay a Absalom! Hey Absalom a wata kolay! Wata kolay!"

5 Na giyoto a somiyoled si Yowab ko walay o dato na pitero iyan on a "Sangkai a gawii na piyakayaan ka so langon a sondaro ngka, a so manga mama a somiyabet ko niyawa ngka ago so niyawa o manga wata a ka a manga mama ago manga babay, ago so niyawa o manga karoma ngka ago manga sandil.

6 Lagid o ba ngka pekebabayai so siran oto a pepanga gogowad reka, ago ipekegowad ka so pepanga babaya reka, ka piyakarayag ka imanto a gawii a da a bali niyan reka so manga sondaro ngka ago so manga olowan iran. Pekeilay aken a masosoat ka o oyagoyag imanto si Absalom ago langon kami na miyamatay.

7 Na, mbowat ka imanto na go ka liyo na pangoyati ngka so manga taw ngka! Ka ipesepa aken sii ko Allah a o di ka lomiyoy na da den a sakataw bo ko manga ped ka a ba kelamba sangkai a kakegagawii niyan. Na lebi reka ini a maregen a di so langon a siksa a minitana reka ipoon ko kangoda ngka taman imanto."

8 Na mimbawat so dato, na lominiyo ago miyontod ko obay o gimowa o siti. Kagiya matero ko manga mama niyan a "Moontod so dato sii ko gimowa," na palaya siran on miyangadap.

Komiyasoy si Daod sa Yarosalim

Samaoto na miyamakapagapas den so langon o manga Israil ko manga walay iran.

9 Na sii ko langon a mbatabataa sa Israil na dii ndadaowai so manga taw ron a tig iran ko oman i isa kiran a "Piyokas tano o dato Daod ko lima o manga ridoay tano na sekaniyan i somiyabet rektano ko kapaar o manga Pilistiyo. Ogaid na piyalagoyan iyan imanto so inged sabap ki Absalom,

10 Na si Absalom a siyalawatan tano a madato na miyatay ko katidawa. Kagiya ka maoto na ino tano di pengnii so dato Daod sa kapakakasoy niyan?"

11 Giyangkai a dii matero ko dalem a inged a Israil na minirampay ko dato Daod apiya sii ko walay niyan. Kagiya ka maoto na inipakawit iyan ki Sadok ago si Abiyatar a so manga imam so katero a "Isei niyo so manga pelokelokesen sa Yodah sa 'Ino sekano i keori sa kapekakasoya niyo ko dato ko torogan iyan?"

12 Sekano i rogo aken ago manga tonganay aken. Kagiya ka maoto na ino sekano i keori sa kapekakasoya niyo ko dato?"

13 Na go teroa niyo ki Amasa a 'Ba di rogo ago tonganay aken seka? Kamorkaan ako o Tohan sa tanto a maregen o di aken seka sambiin imanto ki Yowab a komandir o manga sondaro.' "

14 Na kiyaayokan i Daod so manga poso o langon a mama sa Yodah a lagid o o isaisa siran i pamikiran, na inipakawit iran ko dato so katero iran a "Kasoy ka, seka ago so langon a ped ka."

15 Mandiyadi na gomiyanat so dato ka kesoy sa Yarosalim, na kagiya makaoma ko lawasaig a Yordan na inalaw sekaniyan o langon a taw sa Yodah a miyakaoma roo sa Gilgal sa kiperipagen iran ko dato sii ko lawasaig.

16 Samaoto mambo na minggagaan roo somong si Simay a wata i Gira a taw sa Baniyamin a poon sa Bahorim sa kapagalawa niyan ko dato Daod.

17 Aya ped iyan na sanggibo a manga taw sa Baniyamin. Na miyakaoma mambo si Siba a so talasogoay o familiya i Saolo a rakes o sapolo ago lima a manga wata iyan a manga mama ago dow polo a manga oripen iyan. Minggagaan siran somong sa Yordan a ndodon so dato.

18 Na rominipag siran ko lawasaig kaan iran on miperipag so familiya o dato ago mapenggolaola iran so apiya antonaa i kabaya iyan.

Inikalimo i Daod si Simay

Kagiya makaripag si Simay a wata i Gira sa Yordan na gomipe ko hadapan o dato

19 Na pitero iyan on a "Pengnin ko a di ako ngka salaan, kadnan ko. Di ngka tedemi so pinggolaola ko a ribat sii ko gawii a kiyaawa a ka sa Yarosalim. Pengnin ko a di ngka tegoon ko poso o ka

20 Ka katawan aken a miyakandosa ko a oripen ka, na giyanan i sabap a saken i pagampaganay sii ko mbatabataa a Yosop a miyakaoma sii sa kiyaalawa niyan reka, kadnan ko a dato."

21 Ogaid na pitero i Abisay a wata i Siroyah a "Piyantinaan i Simay so miyapili o Allah a dato; ba ini rekaniyan di mbonoon?"

22 Na pitero i Daod ki Abisay ago so pagari niyan a Yowab a "Kena a ba tano ndatar sa pamikiran, manga wata i Siroyah. Miyabaloy kano den a pepamanopak raken! Imanto na saken i dato sa Israil, na da den a taw sa Israil a ba mbonoa sangkai a gawii."

23 Na pitero i Daod ki Simay a "Di ka petay," na inisepa on ai o dato.

Inikalimo i Daod si Mepibosit

24 Miyakaoma roo mambo si Mepibosit a apo i Saolo sa kapagalawa niyan ko dato. Da niyan den onabi so ai niyan o di na pangopawi so sompa iyan aya pen o ba niyan pipii so nditaren iyan ipoon ko gawii a kiyaawa o dato sa Yarosalim taman ko kiyapakakasoy niyan sa da a rayorayo a ginawa niyan.

25 Kagiya makaoma si Mepibosit a poon sa Yarosalim na iniise on o dato a "Ino ka raken da onot, Mepibosit?"

26 Tig iyan a "Kadnan ko a dato, sabap sa lepo ako na pitero aken ki Siba a talasogoay aken a siyaan ako niyan sa kimar a kapegedaan aken kaan ako makaonot ko dato. Ogaid na tinipo ako niyan

27 Ka piyamokegan ka niyan makapantag raken, kadnan ko a dato. Ogaid na datar ka o malaikat o Tohan na saden sa mapipikir ka a mapiya na nggolaolaa ngka den.

28 Aya bo a patot a ikidia ngka ko familiya o ama aken a dato na kapatay; apiya pen oto na ineped ako ngka ko siran oto a pepekakan sii ko lamisaan ka. Na da den pen a sala a mapengni aken reka, dato."

29 Na pitero on o dato a "Ino ka pen petero makapantag sii? Miyapamikir aken den a mapembagi iyo ago si Siba so tamok i Saolo."

30 "Pakikowaan ka on so langon taman, kadnan ko a dato," a inisembag i Mepibosit, "asar a miyakabaling ka a mapipiya a ginawa ngka."

Inikalimo i Daod si Barsilay

31 Si mambo si Barsilay a taw sa Giliyad na miyakaoma roo a poon sa Rogilim sa kindologen iyan makaripag ko dato sa Yordan.

32 Tanto a miyalokes si Barsilay ka miyakawalo polo ragon a idad iyan. Tanto sekaniyan a tatamoken na miyapageper iyan so dato isako komakaden sa Mahanaim.

33 Na pitero on o dato a "Onot ka raken ago kaden ka raken sa Yarosalim ka pageperen ko seka roo."

34 Ogaid na pitero i Barsilay ko dato a "Pira pen ragon a katey aken ko doniya a ba ako baden pagonot ko dato sii sa Yarosalim?"

35 Miyakawalo polo ragon a idad aken na di aken den mapakapesenggaya so mapiya ago so marata. Di aken den ketaam so pekekan aken ago pekeinom aya pen o ba ko pekeneg so idaida o manga pababayok a manga mama o di na babay. Ino ako reka baden ai pekabalang, kadnan ko a dato?

36 Ino raken pen ai mbalasen o dato? Magonot ako reka baden sa di bo mawatan a malepas a Yordan.

37 Oriyan iyan na pakakasoya ko ngka ko inged aken kaan ako sii matay a marani ko kobor o ama ago ina aken. Ogaid na katii so wata aken a si Kimham. Pakaonota ngka den, kadnan ko a dato, na nggolaolaa ngka on so apiya antonaa i ikesoat ka."

38 Tig o dato a "Pekaonot raken si Kimham na penggolaolaan ko ron so mapipikir ka a mapiya, na apiya antonaa i pengnin ka raken na ipenggolalan aken sabap reka."

39 Na giyoto a rominipag si Daod sa Yordan ago so langon a ped iyan. Inarekan iyan si Barsilay ago riyakmatan iyan, na komiyasoy si Barsilay ko inged iyan.

40 Tomiyaros lomalakaw so dato sa Gilgal a moonot on si Kimham, na ipendolog so dato o langon a taw sa Yodah ago so sabagi ko manga taw sa Israil.

So Kiyapepawala makapantag ko Dato

41 Samaoto na miyakaoma ko dato so langon a mama sa Israil na pitero iran on a "Ino so bo so manga pagari ami a taw sa Yodah i romiyapit reka ago iniripag ka iran sa Yordan a rakes o pamilya ngka ago so langon a ped ka? Piyanekew ka iran rekami!"

42 Somimbag so langon a mama sa Yodah a tig iran ko manga mama sa Israil a "Pinggolaola mi ai ka tonganay ami a madaseg so dato. Ino niyo kerarangiten? Da niyan bayadi so pangenengken ami aya pen o ba kami niyan begi sa apiya antonaa."

43 Na tig o manga Israil a "Sapolo kami a mbatabataa a manga Israil a sapolo ai bagi ko ndatoan. Kagiya ka maoto na mala a kipantag ami ki Daod a di sekano. Ino kami niyo pelapisi? Ba di sekami i paganay a miyakatero ko kapekakasoya ko dato?"

Ogaid na somimbag so manga mama sa Yodah sa makeras a di so manga mama sa Israil.

2 SAMOWIL 20

Somiyopak si Siba ki Daod

Miyatabo a ndodoo so da a oked iyan a mama a aya ngaran iyan na si Siba a wata i Bikri a taw sa Baniyamin. Miyamogiyong sekaniyan na inilalis iyan a "Hey manga Israil, da a ba tano bagian ki Daod! Da a kipantag rektano angkai a wata i Yasay! Song so oman i isa rektano ko walay niyan!"

2 Mandiyadi na inawaan o langon o manga mama sa Israil si Daod ka miyonot siran ki Siba a wata i Bikri. Ogaid na so manga mama sa Yodah na da iran belaga so dato iran, na inidolog iran ipoon sa Yordan taman sa Yarosalim.

3 Kagiya makaoma si Daod ko torogan iyan sa Yarosalim na kinowa niyan so sapolo a sandil iyan a inibegak iyan gowani a makakibir ko torogan na tiyago iyan siran ko walay a nggogordiyaan. Pepageperen iyan siran ogaid na di niyan siran den perembangen. Na makakalaboso siran den taman ko kiyapamatay iran a pepaginetaw siran a datar o manga bitowanen.

4 Oriyan iyan na pitero o dato ki Amasa a "Sogoi ngka so manga mama sa Yodah sa kasong iran raken sii ko soled o telo gawii, na song ka raken sii mambo."

5 Ogaid na sii ko kapelalakaw i Amasa sa kasogoi niyan kiran na miyatey sekaniyan a di so tataalikan on o dato.

6 Sabap roo na pitero i dato ki Abisay a "Imanto na lebi rektano a pekabinasa si Siba a di si Absalom. Pakaonota ngka so manga gordiya aken na telokoni niyo sekaniyan, ka o ba baden makatoon sa kokotaan a siti na kepalagoyan tano niyan."

7 Na so manga sondaro i Yowab ago so manga gordiya o dato a rakes o langon a manga wawaraw a sondaro na gomiyanat sa Yarosalim a pagoolowanan i Abisay sa kapeselobaa iran ki Siba a wata i Bikri.

8 Kagiya makaoma siran ko mala a lakongan sii sa Gibiyon na minitoona iran si Amasa. Somosolot si Yowab sa nditaren iyan a sondaro na sesambitan sekaniyan pen a sii niyan tatakipen so gonong iyan ko tagoban iyan. Na sii ko kapelakad iyan sa kaselama niyan ki Amasa na miyaolog so gonong ko tagoban iyan.

9 Pitero i Yowab ki Amasa a "Mapipiya a ginawa ngka, pagari ko?" Na kiyapetan i Yowab a kamanan a lima so sompa i Amasa sa kapagareki niyan on.

10 Ogaid na da kaiktiyari i Amasa so gonong sii ko diwang a lima i Yowab, na inisoker ai i Yowab ko tiyan i Amasa na minibontad so tinai niyan ko lopa. Da niyan den gonongi peroman na miyatay si Amasa. Mandiyadi na tomiyaros somaloba si Yowab ago so pagari niyan a Abisay ki Siba a wata i Bikri.

11 So isa ko manga mama i Yowab na tominindeg ko kilid o lawas i Amasa na tomiyalo ko manga sondaro i Amasa a tig iyan a "Apiya antawaa i tomatampil ki Yowab ago tomotoman ki Daod na onot ki Yowab!"

12 Ogaid na so lawas i Amasa na makakekelit ko look o lalan a makatotona ko rogo iyan. Na kagiya mailay o mama a petereg roo so oman i isa a pepekaoma on na kinowa niyan so lawas na pitonda iyan a poon ko lalan ka inowit iyan ko pangomaan, na kiyoloban iyan sa nditaren.

13 Kagiya mada so lawas ko lalan na tomiyondog so langon a mama ki Yowab sa kapeselobaa iran ki Siba.

14 Si peman si Siba a wata i Bikri na inipanagad iyan so manga inged o langon a mbatabataa sa Israil taman den sa siti a Abil Bit Maaka, na so langon a taw ko mbawataan i Bikri na mitimotimo siran na miyonot ki Siba somoled ko siti.

15 Da matey na miyakaoma roo si Yowab ago so langon a sondaro niyan na linikopan iran so siti. Initambak iran so lopa ko liyo o kota iyan na peperompin iran ai sa katempaga iran on.

16 Sarta den na aden a miyananalo a maongangen a babay sii ko poro o kota o siti a tig iyan a "Pamakineg kano! Pamakineg kano! Teroa niyo ki Yowab a somong sii kaan aken mimbityarai."

17 Kagiya makarani ron si Yowab na tig o babay a "Ba seka si Yowab?"

"Saken," a inisembag iyan.

"Pamakinega ngka so peteroon o oripen ka a babay," a tig iyan.

"Pemakineg ako," a tig i Yowab.

18 Na pitero pen o babay a "Isako miyatey den na aya dii matero na 'Pekakowa kano sa mosawir sa siti a Abil,' na giyanan i kakepasad o rido.

19 Sekami i lomilintad ago pepamaratiyaya sii sa Israil. Petepengan ka minasa so siti a datar o ina sii sa Israil. Ino ngka kebayai lomamed so kawali o Allah?"

20 "Mawatan anan raken!" a inisembag i Yowab. "Mawatan raken o ba ko pelameda o di

na ba mbinasaa so siti niyo!

21 Kena a ba giyanan i takdir aken. Aden a mama a iningaranan sa Siba a wata i Bikri a poon sa kapalawan a inged sa Ipraim na siyopak iyan si dato Daod. Palada niyo raken angkai a sakataw a mama ka awaan aken so siti."

"Ipagitog ami reka so olo niyan sii ko keleb," a pitero o babay ki Yowab.

22 Mandiyadi na somiyong so babay ko langon a taw ko siti na miyosawiran iyan siran sa kaongangen. Na piyotol iran so olo i Siba na iniitog iran ki Yowab. Sabap roo na miyamogiyong sekaniyan a tanda sa kapagawai o manga mama niyan ko siti. Na mimbabaling so oman i isa kiran ko walay niyan na komiyasoy si Yowab ko dato sa Yarosalim.

So manga Sanasanaan i Daod

23 Si Yowab i olowan o langon a sondaro sa Israil; si Binaya a wata i Yahoyada na aya olowan o manga gordiya o dato;

24 Si Adoniram na aya kapatas ko piyamanegel nggalebek; si Yahosapat a wata i Ahilod na aya komikibir ko manga rikord;

25 Si Siyaba na aya panonorat; si Sadok ago si Abiyatar na aya manga imam,

26 Na si Ira a taw sa Diyair na imam mambo i Daod.

2 SAMOWIL 21

Inisaop so manga taw sa Gibiyon

Sii ko kandadato i Daod na aden a maregen a taon ko inged a miyakatondotondog ko miyakatelo ragon. Inisean i Daod so Allah mipantag sii na pitero on o Allah a "Minisabap ai ko kasalaan i Saolo ago so pamiliya niyan, ka piyamono iyan so manga taw sa Gibiyon.

2(So manga taw sa Gibiyon na kena a ba maaped ko manga Israil ka maito siran a sagorompong a manga Amoriyo. Minisepa kiran gowani o manga Israil a di iran siran mbonoon, ogaid na si Saolo sabap ko tindeg iyan ko manga taw niyan sa Israil ago giya Yodah na tipengan iyan siran molang.)

3 Kagiya ka maoto na piyakisongowan i Daod so manga taw sa Gibiyon na inisean iyan siran a tig iyan a "Antonaa i penggolaolaan ko rekano? Antonaa i panginsalaan a kibegay aken rekano kaan kami niyo karakmati a manga taw o Allah?"

4 Tig o manga taw sa Gibiyon a "Di kami kapengangapinan sa pirak o di na bolawan a rek i Saolo ago so pamiliya niyan aya pen o ba aden a kabenar ami sa kabonoa mi ko apiya antawaa sii sa Israil."

"Apiya antonaa i pengnin iyo na penggolaolaan ko rekano," a iniise i Daod.

5 Tig iran a "Piyaminasa kami i Saolo ka piyagitaan kami niyan sa kaponasa niyan rekami sa apiyia anda sii sa Israil.

6 Sabap roo na palada ngka rekami so pito kataw a manga mama ko mbawataan iyan ka mbitinen ami siran ko hadapan o Allah sii sa Gibiyah a inged i Saolo a so dato a miyapili o Allah."

"Peladen ko siran rekano," a tig o dato.

7 Na piyakalidas o dato so wata i Yonatan a si Mepibosit a apo i Saolo sabap ko kiyapakasepai i Daod ago si Yonatan sii ko Allah.

8 Ogaid na aya kinowa o dato na so dow a kataw a wata i Saolo a si Armoni ago si Mepibosit a inimbawata on o sandil iyan a si Rispah a wata i Ayas, ago so lima kataw a manga wata o wata a babay i Saolo a si Mirab ago so karoma niyan a si Adriyal a wata i Barsilay a taw sa Miholah.

9 Piyalad siran i Daod ko manga taw sa Gibiyon, na binitin iran siran sii ko bobongan ko hadapan o Allah. Parengan a kiyapamatay iran langon a pito kataw. Piyamono siran sii ko kiyapooni ko kaperagon sa bantad.

10 Si Rispah a aya sandil i Saolo na kominowa sa sako na kiyayat iyan a kaigaan iyan ko obay o lakongan a ndodon so manga bangkay, na komiyaden roo ipoon ko kiyapooni ko kaperagon taman ko kiyapakaoma o pangoran. Da niyan siran pakitanai sa manga banog igira a kadaondaw, ago da niyan siran pakiobain sa maila a binatang igira a gagawii.

11 Kagiya maneg i Daod so pinggolaola i Rispah

12 Na lomiyalakaw sekaniyan ka kowaan iyan so manga tolan i Saolo ago so wata iyan a si Yonatan a poon ko manga magiinged sa Yabis Giliyad. (Piyanekeu iran ai gowani sii ko poblasiyon sa Bit San a ron den binitin o manga Pilistiyo isako mabono iran si Saolo sii sa Palaw a Gilbowa.)

13 Na kinowa roo i Daod so manga tolan i Saolo ago si Yonatan, na piyanimon iyan pen so manga tolan o pito kataw a miyabitin.

14 Inilebeng iran so manga tolan i Saolo ago si Yonatan sii ko kobor o ama i Saolo a si Kis sii sa Sila sa inged a Baniyamin, na ininggolalan iran so langon taman a inipaliyog kiran o dato. Kagiya maipos oto na tiyarima o Tohan so manga pangni iran mipantag ko taon sii ko inged.

So Kiyapakatidawa o Israil ago so manga Pilistiyo

15 Miyakaisa peman a kiyapakatidawa o manga Pilistiyo ago so Israil. Miyonot si Daod ko manga sondaro niyan sa kipetidawaan iran ko manga Pilistiyo, na tanto sekaniyan a inikopay.

16 Ndodoo si Isbibinob a isa ko moriyataw o manga iganti a so sokot o bangkaw niyan a tombaga na telo ago tenga ka kilo a kapened iyan, na makanggogomaan sekaniyan pen sa bago a pedang, na aya antap iyan na mbonoon iyan si Daod.

17 Ogaid na si Abisay a wata i Siroyah na piyanabangan iyan si Daod ka giyobat iyan so iganti a Pilistiyo na biyono iyan. Na misepa ki Daod so manga mama niyan a tig iran a "Di ka rekami den pekaonot peroman ko katidawa kaan di kepareng so solo o Israil."

18 Da peman matey na aden peman a kiyapakatidawa iran ago so manga Pilistiyo sii sa Gob. Sangkoto a masa na si Sibekay a taw sa Hosat na miyakapatay sa ped a iganti a aya ngaran iyan na si Sap.

19 Sii ko miyakaisa pen a kiyapakatidawa iran ago so manga Pilistiyo sii sa Gob na si Ilhanan a wata i Yair a taw sa Bitlihim na biyono iyan si Goliyat a taw sa Gat a makaaawid sa bangkaw a so lawas iyan na datar sa katiwaro o ndo.

20 Sii pen ko ped a katidawa sii sa Gat na aden a tanto a mala a mama a ndenem i kemer

sa lima ago sa ai; dow a polo ago pat langon a kemer iyan. Moriyataw sekaniyan mambo o manga iganti. Piyangerar iyan so manga Israil na biyono sekaniyan i Yonatan a wata i Simayas a aya pagari i Daod.

22 Giyangkai a pat kataw a moriyataw o manga iganti sii sa Gat na miyapatay i Daod ago so manga mama niyan.

2 SAMOWIL 22

So Idaida i Daod a Podi

Inidikir i Daod ko Allah angkai a manga katero ko kiyasabeta on o Allah ko lima i Saolo ago so langon a ped a ridoay niyan.

2 Tig iyan a

So Allah i lakongan aken, kota aken ago pepekalidas raken.

3 So Tohan ko na aya ko lakongan a ron ako pepagapas, so kelong aken ago so bager o kapekesabet aken.

Sekaniyan i maporo a lindonga aken

a aya ko pekeapasan ago pepanabet raken
pesebeten ako niyan ko manga tangarasi.

4 Igira a petelowan ko so Allah a patot a kapepodiya on na pekesabet ako ko manga ridoay aken,

5 Kiyakoloban ako o manga begel o kapatay; inikalek aken so pekabinasa a manga degan.

6 Minilikos raken so manga patong o kobor; kiyalitagan ako o manga sampirot o kapatay.

7 Na sii ko kaiiloti raken na miyananalo ako ko Allah; miyakagoraok ako ko Tohan ko.

Sii ko Timplo niyan na miyaneg iyan so lagam aken; minisampay ko tangila niyan so kiyagoraok aken.

8 Mandiyadi na tiyabeker ago milinog so doniya; so pen so manga kaonayan ko manga langit na piyamanabad ago miyanga kokokog, ka kiyararangitan sekaniyan.

9 Somiyalepot so bel ko ngirong iyan; miyakapoon ko ngari iyan so pepekalengan a apoy, na somiyokeyaw ron pen so pekedeg a waga.

10 Inikayang iyan so manga langit na miyanog sekaniyan a matatago so makapal a maliboteng ko didalem o manga ai niyan.

11 Miyageda sekaniyan ko pepapak a kaaden na lomiyayog; mipeyag sekaniyan sii ko manga papak o ndo.

12 Inibongkos iyan sa ginawa niyan so maliboteng; mililibet on so domedatem a manga gabon sa langit a mapepeno a oran.

13 Sii ko sindaw ko hadapan iyan na miyamangiteras on so kilakilat.

14 Mandiyadi na mindadalendeg so Allah roo sa langit,

na minigorong so sowara o Lebi a Maporo.

15 Inipana iyan so manga gasa
na iniparak iyan so manga ridoay;
pikas iyan so manga kilakilat
na piyakigorigaw niyan siran on.

16 Na kiyasawaan so didalem a ragat,
ago miyapayag so manga onayan o doniya sabap ko kiyambonget o Allah,
ago sabap ko kiyapamisenga niyan sa mabager.

17 Kiyawa ako niyan a poon sa poro na kiyapetan ako niyan;
biyaton ako niyan ko madalem a ig.

18 Siyabet ako niyan ko marangit a ridoay aken,
ago sii ko siran oto a pekegowad raken
a tanto a manga babager a di saken.

19 Giyobat ako iran sii ko gawii a kamomoralai raken,
ogaid na so Allah i tomiyokod raken.

20 Inowit ako niyan ko madaya a darpa;
piyanabangan ako niyan
ka kagiya miyasoat sekaniyan raken.

21 Pipiyapiyaan ako o Allah sabap ko kaontrol aken;
sabap ko kalolompiyo o manga lima ko na biyalasan ako niyan.

22 Ka miyakedeg aken so manga lalan o Allah;
da ako nggolaola sa marata a mitalikod aken ko Tohan ko.

23 Ka so langon a kokoman iyan na palaya aken tatagoon sa ginawa;
da aken den silin so manga taritib iyan.

24 Miyaginetaw ako a di kedawayan sii ko hadapan iyan,
na inilidas aken a ginawa ko ko kadostaan.

25 Biyalasan ako o Allah sabap ko kaontrol aken
ago so kalolompiyo aken sii ko kapegilaya niyan on.

26 Sii ko siran oto a makalimoon
na pepakiilay ngka kiran a makalimoon ka,
na sii ko di penga dadawayan
na pepakiilay ngka kiran a di ka kedawayan;

27 Sii ko kikasosoti
na pepakiilay ngka kiran a masosoti ka,
ogaid na sii ko manga bibid
na pepakiilay ngka kiran a baraakal ka.

28 Pesebeten ka so dii mangangalimbabaan,
ogaid na totaliken ka so pepamangimporoan sa kipembabaan ka kiran.

29 Seka, ya Allah, i solo aken;
pepakaliwanagen o Allah so kalilibotengi raken.

30 Nggolalan reka na pekaato ako ko madakel a manga sondaro,
na nggolalan ko Tohan ko na pekalikin ako ko kota.

31 Makapantag ko Tohan na sayana a madidiyangka so okitokit iyan;
so manga initopa o Allah na katetepengan a benar;
kelong sekaniyan o langon a pepagapas rekaniyan.

32 Ka antawaa i Tohan a makaliyoliyo ko Allah;
na antawaa i Lakongan o di bo so Tohan tano?

33 So Tohan na aya raken dii sembitan sa bager,
na pepakadayaan iyan so lalan aken.

34 Pembalwin iyan so manga ai aken a lagid o ai a saladeng,
na pepakatindegen ako niyan ko manga poporo a darpa.

35 Pelayamen iyan so manga lima ko ko katidawa;
keirat o manga barokan aken so pana a tombaga.

36 Ya Allah, ililinding ka raken so kelong ka a ipepanabet ka,
na so limo o ka i ipepangosor aken.

37 Pepakaoladen ka so lalan a pelalakawan aken
kaan di kekelid so manga palo aken.

38 Piyanaloba aken so manga ridoay aken na bininasa ko siran;
da ako den peto taman sa da siran maiped.

39 Siyasa aken siran sa tarotop, na da siran den makambowat;
miyamakakelit siran ko danga aken.

40 Pisambitanan ako ngka sa bager ko katidawa;
na piyakipeges ka raken so siran oto a miyato raken.

41 Piyakipalagoyan ako ngka ko manga ridoay aken,
na miyabinasa ko so pepanga gogowad raken.

42 Miyangilailay siran sa pekatabang,
ogaid na da a ba kiran somiyabet
apiya so Allah i tiyalowan iran,
ogaid na da niyan siran ampona.

43 Piyakapagombiyombi aken siran a lagid o bayanek sa lopa;
pindadapoan ago pilolomeg aken siran
a datar o lonatay sii ko manga lalan.

44 Piyabangan ako ngka ko kagogobata raken o manga taw,
na piyagipat ako ngka a olowan ako o manga nasiyon.
So manga taw a da a katawi ko ron gowani na pepamanalagad raken,

45 Na so manga rait na pepamanodiyod raken;
anda den i kanega iran raken na peratiyayaan ako iran;

46 Pepanga adaan siran langon sa kawaraw,
na pepeliliyo siran pen ko manga kota iran a kitatabaden.

47 Oyagoyag so Allah! Mapodi so Lakongan aken!

Mabantog so Tohan a so Lakongan a aya ko pananabet!

48 Sekaniyan so Tohan a ipeseop ako niyan
a pepakipaar iyan raken so manga nasiyon,

49 Ago pembelagen ako niyan ko manga ridoay aken!

Piyakidaag ka raken so siran oto a miyato raken;
piyanabangan ako ngka ko tanganiyaya a manga taw.

50 Kagiya ka maoto, ya Allah, na podin ko seka sii ko manga nasiyon,
na ndidaon ko a manga podi so Ingaran ka.

51 Pembegan o Tohan sa mangaala a kapakataban so dato iyan;
pepakiilay niyan so da a pitetamanan a gagaw niyan ko mama a kiyaidinan iyan,
a so Daod ago so pekebabadan on sa taman sa pakataman.

2 SAMOWIL 23

So Moripori a Katero i Daod

Si Daod a wata i Yasay na aya mama a inipangkat o Tohan sa maporo, a so miyapili o Tohan o Yakob a madato, ago so pekebabayaan a padidikir sa manga sabor sii sa Israil. Giyai i moripori a manga katero i Daod:

2 "Dii tero so Roh o Allah a nggolalan raken;
sisii so manga katero iyan ko dila aken.

3 Mitero so Tohan o Israil;
so Lakongan o Israil na pitero iyan raken a
'So dato a pendato ko manga taw sii ko kaontol
a aya ipendato iyan na so kalek ko Tohan

4 Na lagid sekaniyan o sinar o alongan ko kapesebang iyan
sii ko kada a gabon a kapipita,
ago lagid o kapekerap o paotanotan ko kiyaiapos o oran.'

5 Mataan den a datar oto so kebabadan raken,
ka mimbaal so Tohan sa da a ikeda iyan a kapasadan mipantag raken
a matatanor ago di den kebaroba so langon a betad iyan.
Pekaosoren iyan so kapiya ko i bobolos
ago so langon a masisinganin aken.

6 Ogaid na so da a katohanan iyan a manga taw
na lagid o manga sorok a ipelambeg a di keseko a lima.

7 Apiya antawaa i seko sa manga sorok na pekaosar sa tongkas
o di na lawas o bangkaw,
na pembisolai ai baden sii ko katatagoan kiran."

So manga Wawaraw a mama i Daod

8 Giyai i manga ngaran o 'Telo Kataw' a lebi a manga wawaraw a mama i Daod: si Yosib Basibit a poon sa Takimon na aya kiran olowan. Inatowan iyan a bangkaw so walo gatos a mama a miyapatay niyan ko miyakaisa a katidawa.

9 Aya ikadowa ko 'Telo Kataw' na si Iliyasar a wata i Dodo a aya wata i Ahohi.
Miyakaisa a gawii na ped sekaniyan i Daod isako raren iran so manga Pilistiyo a titimo a makipetidawa. Na tomiyailis so manga Israil

10 Ogaid na da den pagekar si Iliyasar ko titindegan iyan, na piyamono iyan so manga

Pilistiyo taman sa diyokawan a tanto a lima niyan a makakekempel ko pedang iyan. Na migay roo so Allah sa mala a kiyapakataban sangkoto a gawii. Oriyan iyan na mipeto so manga Israil ki Iliyasar ogaid na giya bo a kapetebani ran ko miyamatay.

11 Aya ikatelo ko 'Telo Kataw' na si Samah a wata i Agi a poon sa Harar. Isako mbekebekes so manga Pilistiyo sii ko pangomaan a mapepeno a kodalis na piyalagoyan siran o manga Israil.

12 Ogaid na baden titindeg si Samah ko look o pangomaan na lininding iyan, na piyamoto iyan so manga Pilistiyo. Na migay roo so Allah sa mala a kiyapakataban.

13 Sii ko masa a kaperagon na telo ko 'Telo Polo' kataw a manga poporo a olowan na siyongowan iran si Daod sii ko liyang sa Adolam, na aden a sagorompong a manga Pilistiyo a kekampo ko Balintad a Ripaim.

14 Sa masa oto na sisii si Daod ko kota na aya kakadenan o manga sondaro a Pilistiyo na giya Bitlihim.

15 Na miyakasingayo si Daod a tig iyan a "O ba aden bo a makakowa raken sa ig a poon ko paridi a marani ko gimowa a Bitlihim!"

16 Sabap roo na so telo a manga wawaraw a mama na inopak iran mokit so kampo o manga Pilistiyo na somiyageb siran sa ig ko paridi a marani ko gimowa a Bitlihim, na inowit iran ki Daod. Ogaid na di niyan kabaya o ba niyan inoma, ka ba niyan den inodod a inisapaat ko Allah

17 A tig iyan a "Mawatan raken, ya Allah, o ba aken inoma! Ba ini di rogo o manga mama a somiyong roo a iniserakan iran a niyawa iran?" Na da on den inom si Daod.

Giyanan i pinggolaola o telo kataw a manga wawaraw a sondaro.

18-19 Si Abisay a pagari i Yowab a wata i Siroyah na aya lebi a kababantogan sangkai a telo kataw na miyabaloy a olowan iran. Inatowan iyan a bangkaw so telo gatos a manga mama na piyamoto iyan siran, na kiyabantogan sekaniyan a datar o paganay a 'Telo Kataw' apiya pen kena a ba sekaniyan kiran maaped.

20 Si Binayas a wata i Yahoyada a poon sa Kabsil na isa mambo ko kababantogan a manga sondaro a madakel a pinggolaola niyan a nggolalan ko kawaraw. Biyono iyan so dow a kataw a lebi a mabager a sondaro sa Mowab. Miyalosod sekaniyan pen ko galebo na miyakapatay ron sa arimaw sii ko kapengoran iyan sa ilo.

21 Na biyono iyan so mala a sondaro a Imisiren a makanggogomaan sa bangkaw. Aya bo a iniato ron i Binayas na bentol, na inagaw niyan so bangkaw ko lima o Imisiren na aya niyan on inibono.

22 Giyanan i manga pinggolaola i Binayas a wata i Yahoyada. Datar sekaniyan sa bantogan o 'Telo Kataw' a manga wawaraw,

23 Na lebi sekaniyan a kiyabantogan a di so apiya antawaa ko 'Telo Polo Kataw' ogaid na da sekaniyan mibilang ko 'Telo Kataw'. Na initoro sekaniyan i Daod a maporo ko manga gordiya niyan.

Aya maaped ko 'Telo Polo' na:
si Asahil a pagari i Yowab,
si Ilhanan a wata i Dodo a poon sa Bitlihim,

25 Si Samah a poon sa Harod,
 si Ilika a poon sa Harod,
26 Si Hilis a poon sa Pilit,
 si Ira a wata i Ikis a poon sa Tikowa,
27 Si Abiyasar a poon sa Anatot,
 si Mibonay a poon sa Hosiyah,
28 Si Salmon a poon sa Ahoh,
 si Maharay a poon sa Nitopah,
29 Si Hilib a wata i Baanah a poon sa Nitopah,
 si Itay a wata i Ribay a poon sa Gibiyah sa inged a Baniyamin,
30 Si Binayas a poon sa Piraton,
 si Hiday a poon sa manga baogan sa Gaas,
31 Si Abiyalbon a poon sa Arabah,
 si Asmabit a poon sa Bahorim,
32 Si Iliyaba a poon sa Siyaalbon,
 so manga wata i Yasin,
 si Yonatan,
33 Si Siyamah a poon sa Harar,
 si Ahiyam a wata i Siyarar a poon sa Harar,
34 Si Ilipilit a wata i Ahasbay a poon sa Maakah,
 si Iliyam a wata i Ahitopil a poon sa Gilo,
35 Si Hisray a poon sa Karmil,
 si Paaray a poon sa Arab,
36 Si Igal a wata i Natan a poon sa Sobah,
 si Bani a poon sa Gad,
37 Si Silik a so Amoniyo,
 si Naharay a poon sa Birot a aya pegawid ko gomaan i Yowab a wata i Siroyah,
38 Si Ira a poon sa Yatir,
 si Garib a poon sa Yatir,
39 Ago si Oriyas a Hitiyo.
 Telo polo ago pito kataw langon a manga wawaraw a sondaro.

2 SAMOWIL 24

Binilang i Daod so manga Taw

1-2 Kiyarangitan peroman o Allah so manga Israil. Kagiya ka maoto na piyakaseriat iyan si Daod sa kapakanggolaola niyan sa kidaneg kiran o Allah, ka pitero i Daod ki Yowab a komandir o manga sondaro a "Lalakaw ka na go ka bilanga so manga taw sa Israil ago sii sa Yodah. Neba ngka so langon a mbatabataa a Israil ko pirowarowangan o inged na listaan ka so manga taw kaan aken katokawi i kadakel iran langon."

3 Ogaid na pitero i Yowab ko dato a "Pengnin ko ko Allah a pagomanan iyan so manga taw sa magatos takep ko kadakel iran imanto ago mamboway ka, kadnan ko a dato, kaan ka mailay! Ogaid na ino ngka ini kebayai nggolaola?"

4 Apiya pen oto na domiyaag so katero o dato ki Yowab ago so manga olowan a sondaro, na gomiyanat siran ko dato ago lomiyalakaw sa kambilanga iran ko manga taw sa Israil.

5 Rominipag siran sa Yordan na mikempo sa pagabagatan o siti a Arowir sii ko look o balintad sa inged a Gad. Ipoon roo na somiyong siran sa Yasir,

6 Na tomiyaros den sa Giliyad ago sii pen sa Kadis sii ko pagiingedan o manga Hitiyo. Ipoon roo na somiyong siran sa Dan ago sii tampar sa sedepan taman sa Sidon.

7 Oriyan iyan na miyantap siran sa pagabagatan taman sa kokotaan a siti a Tiro ago sii pen ko langon a inged o manga Hibiyo ago manga Ikanaanen, na sii sa moripori na somiyong siran sa Birsiba sii sa pagabagatan a Yodah.

8 Kagiya mipanagad iran so dalem a inged na komiyasoy siran sa Yarosalim ko kiyapopos o siyaw olan ago dowo polo gawii.

9 Na iniripot i Yowab ko dato so kadakel o manga taw; walo gatos nggibo a manga mama a pekakena sa pedang sii sa Israil, ago lima gatos nggibo sii sa Yodah.

So Kiyandadaneg sabap ko Dosa i Daod

10 Na misendit bo si Daod kagiya mapasad iyan milang so manga taw, na pitero iyan ko Allah a "Miyakandosa ko sa mala ko pinggolaola ko! Pengnin ko reka, ya Allah, a pakadaa ngka so kasalaan aken a oripen ka, ka miyakanggolaola ko sa tanto a kalalalongan!"

11 Sa da pen kapakambowat i Daod ko telondog a gawii na minitoron so katero o Allah ki Gad a so nabi i Daod. Pitero on o Allah a

12 "Ika roo na go ngka teroa ki Daod a 'Giyai i pitero o Allah: Began ko seka sa telo a pemilian. Pilia ngka so isa on a midaneg aken reka.' "

13 Na somiyong si Gad ki Daod na piyanotol iyan on so pitero o Allah, na iniise iyan a "Antonaa i piliin ka? Telo ragon a taon sii ko inged ka, o di na telo olan a kapepalagowi ngka ko manga ridoay ngka a peseloba reka, o di na telo gawii a kasiksa sa paniyakit ko inged ka? Na, pamimikirana ngka na teroa ngka o antonaa i misembag aken ko Allah a somiyogo raken."

14 Tig i Daod a "Tanto ako a masososa. Tomo a sii kami maolog ko lima o Allah, ka mala so kapedi iyan; pengnin ko a di ako maolog ko lima o manosiya!"

15 Sabap roo na inowitan o Allah sa paniyakit a Israil ipoon sangkoto a kapipita taman ko kiyapopos o tiyaalikan iyan on, na pito polo nggibo a manga Israil a miyamatay sii ko pirowarowangan o inged.

16 Kagiya beteren o malaikat a lima niyan sa kasiksa niyan sa Yarosalim na mikerata a ginawa bo o Allah sabap ko morala na pitero iyan ko malaikat a pepaminasa ko manga taw a "Kiyatangkaan den! Taregen ka a lima ngka!" Sangkoto a oras na sisii so malaikat o Allah ko obay o pegegikan sa pereperan a rek i Araonah a Hibosiyo.

17 Miyailay i Daod so malaikat a pepekatay ko manga taw na pitero iyan ko Allah a "Saken i miyakandosa ago miyakanggolaola sa ribat. Giyangkai a manga taw na lagid baden o manga bilibili. Antonaa i miyanggolaola iran? Saken i pakatanai ngka sa lima ago so pamiliya ko."

Mimbaal si Daod sa Aparan

18 Sii sangkoto a gawii na somiyong si Gad ki Daod na pitero iyan on a "Song ka ko pegegikan i Araonah a Hibosiyo na mbaalen ka roo sa aparana so Allah."

19 Na somiyong roo si Daod ka ipenggolalan iyan so inisogo on o Allah a nggolalan ki Gad.

20 Kagiya mailay i Araonah so dato ago so manga sanasanaan iyan a pepekaantap rekaniyan na inalaw niyan siran. Gomipe sekaniyan ko lopa ko hadapan o dato

21 Na iniise iyan a "Ino ka sii pekaoma, kadnan ko a dato, ko oripen ka?"

"Pemasaan ko so pegegikan ka," a inisembag i Daod, "kaan aken on mimbaal sa aparana so Allah kaan mitareg so kapesiksaa ko manga taw."

22 "Kowaa ngka den, kadnan ko a dato," a tig i Araonah, "na sapaaten ka on ko Allah so apiya antonaa i kabaya a ka. Ilaya ngka, ka kataya so manga sapi a kisapaat a totongen, na kataya pen so parabowat ago manga kokoong sa sapi a ipagitagon on.

23 Imbegay aken reka ini langon, dato, na pengnin ko a terimaan o Allah a Tohan ka so ipesoasoat ka on."

24 Ogaid na pitero o dato ki Araonah a "Kena; mataan den a mbayadan ko reka saden sa arga iyan. Ka di aken isepaat ko Allah a Tohan ko so manga korban a petotongen a ba da a minibayad aken on."

Sabap roo na piyamasan i Daod so pegegikan ago so manga sapi sa arga a lima polo a pelata a pirak.

25 Na mimbaal roo si Daod sa aparana ko Allah na somiyapaat sekaniyan on sa manga korban a petotongen ago manga korban pantag bo ko kanggiginawai. Oriyan iyan na inampon o Allah so pangni mipantag ko inged na minitareg so kasiksaan sa Israil.